

Heer

Alkma.

TUTA SEMINARII.

Amst.

50

Aret

an

Bkk

EBes

lom

Breda.

Delft.

hou

l

ve.

Haaren

Haarlen



STATUTA SEMINARII
DIŒCESIS BUSCODUCENSIS

(2^a. Sectionis in Haaren)

jam pridem anno 1850

ORDINATA ATQUE PRÆSCRIPTA

AB ILLUSTRISSIMO AC REVERENDISSIMO DOMINO

HENRICO DEN DUBBELDEN,

Episc. Emausensi, i. p. i., Vicar. Apost. Buscoducensi,

revisa ac denuo proposita

anno 1883


per Episcopum Buscoducensem

ADRIANUM GODSCHALK.



Gestel St. Michaëlis,

EX TYPOGRAPHIA DIŒCESIS BUSCODUCENSIS
IN INSTITUTO SURDO-MUTORUM.



*Quicumque hanc regulam secuti fuerint, pax super illos
et misericordia, et super Israël Dei.*

AD GAL. VI. 17.



HENRICUS DEN DUBBELDEN,

DEI ET APOSTOLICÆ SEDIS GRATIA

EPISCOPUS EMAUSENSIS (IN PART. INF.)

VICARIUS APOSTOLICUS BUSCODUCENSIS,

R. R. admodum D. D. Præsidi, Directori, Profes-
soribus, nec non charissimis Seminarii
nostri (2. Sect.) Alumnis,

salutem in Domino!

Quanti ponderis sit Seminarium bene institutum, idoneisque regulis munitum, ex concilii Tridentini ac Romanorum Pontificum actis satis abunde innotescit.

Imprimis sancta Synodus, Sess. XXIII. Cap. XVIII. de Ref., de *Seminariis*, ac præsertim de *Regulis* inibi ab Ordinario figendis late tractat, simulque et methodum tradit, juxta quam dictæ Regulæ constituentur earumdemque constanti observationi provideatur.

Magnam ex Seminariis ita ordinatis orituram utilitatem præ sagientes Tridentini Patres, ingenti cum gaudio decretum exceperunt, adeo ut (referente PALLAVICINO) (*), „plures Patres affirmarint, ubi nullus fructus ex hoc Concilio decerptus fuisset, hunc labores omnes et incommoda compensaturum;” neque spem bonam eventus fefellit, quare R. Pontifex GREGORIUS XIII, qui fructuum primitias sub S. CAROLO conspexerat, asserere non dubitavit, Seminario- rum institutionem *afflatu Divino* a Tridentinis Patribus decretam fuisse. Mirandum igitur non est subsequentes RR. Pontifices, dignissimos tam fœcundi instituti æstima- tores, nunquam destitisse zelum et vigilantiam Episcopopo- rum in instituendis et bene dirigendis Seminariis nutrire, et, si possent, augere. Ut pauca, quæ recentiora sunt, Pontificum monita adducamus, BENEDICTUS XIV, in Epis- tola Encyclica et commonitoria, initio S. Pontificatus sui, ad universos Episcopos totius orbis Catholici directa dd. 3^a Decembris 1740, § II. hoc modo Episcopos alloquitur: „Et quoniam supra quam dici possit interest eos, qui in sortem Domini vocantur, ab ineunte ætate ad pietatem, morumque integritatem et ad canonicam disciplinam, ve- luti novellas plantationes in juventute sua informari; cordi idcirco vobis esse debet, ut, ubi forsam nondum instituta fuerint clericorum Seminaria, quam citissime instituan- tur, vel jam instituta amplificentur, si majori alumnorum

(*) Hist. Conc. Trid. Lib. 21. Cap. 8. N^o. 3.; item FELLER, Art. PIE IV.

numero pro ecclesiarum conditione opus sit, adhibitis in eum finem mediis, quorum parandorum potestate Episcopi jam sunt instructi; et quibus alia etiam, si de eorum necessitate a Vobis edocti fuerimus, addituri et Nos sumus. Eadem vero Collegia singulari vestra sollicitudine foveantur necesse est, videlicet ea sæpe invisendo, singulorum adolescentium vitam, indolem et in studiis profectum explorando, magistros idoneos virosque ecclesiastico spiritu præditos ad eorum culturam destinando, litterarias ipsorum exercitationes, sive ecclesiasticas functiones quandoque præsentia vestra decorando, aliqua denique beneficia iis, qui virtutum suarum specimen clarius præstiterint, majoremque laudem retulerint conferendo. Hujusmodi enim irrigationem arbusculis hisce, dum adolescent, ministrasse non vos pœniteat, sed vestro opere lætissimum deinde vobis referet fructum in uberi bonorum operariorum copia. Consueverunt enim Episcopi sæpius dolere messem quidem esse multam, operarios autem paucos: at fortasse eis quoque dolendum esset, non eam, quam debuissent industriam ipsos adhibuisse, ut operarii ad messem pares aptique formarentur; boni namque et strenui operarii non nascuntur, sed fiunt; ut autem fiant, ad Episcoporum solertiam industriamque maxime pertinet.” BENEDICTUS XIV, in *Epist. Encyclica et commonitoria ad omnes Episcopos de die 3 Decembris 1740.*

Nec minus graviter hortati sunt PIUS VI, PIUS VIII, LEO XII, et novissime PIUS IX, in mediis procellis for-

titer æque ac gloriose regnans, qui in Encyclica dd. 9^a Novembris 1846, ita scribit :

„Præclare scitis (Episcopos alloquens) Vobis summo-
pere cavendum, ne cuiquam, juxta Apostoli mandatum,
cito manus imponatis, sed eos tantum sacris initietis Or-
dinibus, ac sanctis tractandis admoveatis Mysteriis, qui
accurate exquisiteque explorati, ac virtutum omnium or-
natu et sapientiæ laude spectati, vestris Diœcesibus usui
et ornamento esse possint ... Melius enim profecto est,
ut sapientissime monet immortalis memoriæ BENEDICTUS
XIV, Decessor Noster, „*pauciores habere ministros, sed
idoneos, atque utiles, quam plures, qui in ædificationem
Ecclesiæ ne quidquam sint valituri.*” Et paulo inferius per-
guit Pontifex : „Cum autem, Venerabiles Fratres, vestram
sapientiam minime fugiat, idoneos Ecclesiæ ministros non
nisi ex optime institutis Clericis fieri posse, magnamque
vim in recta horum institutione ad reliquum vitæ cursum
inesse, pergite omnes Episcopalis vestri zeli nervos in id
potissimum intendere, ut adolescentes Clerici vel a tene-
ris annis tum ad pietatem solidamque virtutem, tum ad
litteras severioresque disciplinas, præsertim sacras, rite
informentur. Quare Vobis nihil antiquius, nihil potius
esse debet, quam omni opera, solertia, industria, Cle-
ricorum Seminaria ex Tridentinorum Patrum præscripto
instituire, si nondum existunt, atque instituta, si opus
fuerit, amplificare, eaque optimis moderatoribus et ma-
gistris instruere, ac intensissimo studio continenter ad-

vigilare, ut inibi juniores Clerici in timore Domini et ecclesiastica disciplina sancte religioseque educantur, et sacris potissimum scientiis juxta Catholicam doctrinam.... sedulo ac penitus excolantur, quo habere possitis gnavos atque industrios operarios, qui ecclesiastico spiritu præditi, ac studio recte instituti, valeant in tempore Dominicum agrum diligenter excolere ac strenue præliari prælia Domini.”

Quod si tam præclaris RR. Pontificum incitamentis superaddenda jam forent pastoralis sollicitudinis argumenta, quibus Ecclesiarum Præsules, sanctitate et doctrina conspicui, Seminaria sua foverunt, profecto longe præmonitionis limites sermo excurreret; nominare tamen licet S. CAROLUM BORROMÆUM, qui in omnibus, quæ Tridentina Decreta concernunt, fidelissimus ejusdem Concilii interpretes a BENEDICTO XIV laudatur, et ob egregie juxta Tridentini mentem instituta Seminaria, omnium Seminariorum pater et patronus habetur (*); quare inter regulas pro Seminariis editas institutiones Seminarii Mediolanensis ecclesiæ principe loco assignari, et ex iis, tanquam ex fontibus, statuta aliorum Seminariorum hauriri solent.

Huic Seminariorum patri jungendi sunt (neque enim eos præterire fas est) illustres ecclesiæ Buscoducensis Antistites METSIUS, MASIUS, ZOËSIUS, qui temporibus licet difficillimis, in cura Seminarii sui egregia specimina zeli

[*] THOMASSIN. V. et N. Discipl. P. II. L. I. Cap. 102. n° 10.

et vigilantiae pastoralis dederunt; testes horum sunt historia Episcopatus nostri et utraque Synodus Buscoducensis (anno 1571 et 1612 habita); verum eorum opus aut persistere non potuit aut temporum injuria collapsum ad nos non pervenit, et ab eorum successoribus longo tempore intermittere debuit. Primum sub finem saeculi elapsi, extincta Universitate Lovaniensi, p. m. Reverendissimo ANTONIO VAN ALPHEN, antecessori nostro in Vicariatu Apostolico, novum pro Vicariatu nostro Seminarium, zelo incredibili et magno labore, sive temporum calamitatem sive operis fervorem spectemus, erigere datum fuit; adjutus in opere fuit doctus Praesul consilio et ope Eximiorum Dominorum VAN GILS et MOSER, quos omnes tres jure merito Seminarii (quale hodie existit) restauratores non tantum, verum etiam fundatores nuncupamus. Non defuerunt etiam viri tam eximii optimis Regulis, juxta Tridentini praescriptum, Seminarium Nostrum instruere, juxta quas Sanctuarii Alumni ad clericalem vitae normam informarentur.

Nos, tantorum virorum vestigiis insistere cupientes, omnem, pro ratione muneris Nostri, curam ac sollicitudinem adhibere conati sumus, ut dictae leges, novis etiam subinde, prout res ferebat, superadditis, sub laudatissimis Moderatoribus studiose observarentur.

Verum cum nova Seminarii exstructione circumstantiae in multis mutatae sint, ipsaque adeo experientia edocuerit, in quibusdam saltem disciplinae punctis modificationem aut renovationem requiri, operae pretium fore arbi-

trati sumus Statuta illa, ut sparsa sunt, colligere; imo vero in majus Alumnorum commodum (sicut in plerisque aliarum Diœcesium Seminariis fieri hodie consuevit), typis ea mandare; probe enim novimus multo utile fore, si Statuta impressa singuli Alumni manibus teneant, ut non solum litteram, sed sensum quoque et spiritum Regularum jugi meditatione acquirant.

Opportune in hoc negotio Nobis accidit, ut anno elapso Eminentissimus Dominus Cardinalis et Archiepiscopus Mechliniensis Statuta Seminarii sui ediderit, ac Nobiscum ea benigne communicare dignatus fuerit. Et vero meliorem Duce[m] eligere non potuimus. Etenim memoratum volumen pervolventes, comperimus non solum leges Disciplinares hic vigentes in eo contineri eminenter; sed insuper ob præclarissimum in Statutis servatum ordinem, monitaque moralia interposita, opus istud summo opere commendari. Nec mirum, siquidem ipse Eminentissimus Auctor, præterquam ex S. CAROLO BORROMÆO, ex optimis undequaque conquisitis regulis, puta Seminariorum *Romani*, *Veliternensis*, *Farsensis*, etc. etc. Statuta sua magna industria collegerit, atque hodiernis necessitudinibus accommodarit.

Quare, implorato Divino Numine et consilio Illustrissimi Coadjutoris Nostri, auditisque RR. DD. Præsides, Directores et Professoribus Seminarii, rem optimam facturos Nos æstimavimus, si præfata Statuta, paucis solummodo pro circumstantiarum varietate immutatis, pro Se-

minario Nostro adoptare et, prout infra leguntur, in Seminario Nostro servanda præscriberemus.

Auctoritate igitur Nostra Apostolica ea ipsa Statuta, quæ hic sequuntur, approbamus et confirmamus, eisque robur inviolabile et perpetuam obligandi vim adjicimus; eadem auctoritate Nostra præcipientes, ut, præter Nos et Successores Nostros, nemo quidquam adjiciat, demat aut immutet, sed omnes ad quos spectat, vel in futurum spectabit, cuncta accurate observent et adimpleant, vel observari et adimpleri curent.

ADRIANUS GODSCHALK,

DEI ET APOSTOLICÆ SEDIS GRATIA


EPISCOPUS BUSCODUCENSIS,

Moderatoribus et Alumnis Seminarii,

salutem et pacem.

Nostra facientes quæ superius de Statutis Seminarii eorumque sedula observatione præclare dicta sunt; volentes insuper, ob summum rei istius momentum, integram perfectamque illorum executionem pro munere et viribus nostris tueri ac promovere, hæc ipsa Statuta, immutatis iis quæ temporis lapsu moderanda vel complenda videbantur, rursus imprimi curavimus. Dixit aliquando S. IGNATIUS DE LOYOLA, disserens de Regulis Societatis JESU: „Ex observatione Regularum pendet propria perfectio singulorum, sine qua, quidquid demum agas, ad

sanctitatem nunquam pervenies; cum qua sanctitatem certo attinges, absque illusionem et periculo. Quod utrumque de minimis etiam Regulis verum est” (*Exerc. spir. consid. X*). Veridica hæc dictio ad Statuta Seminarii pari modo applicari potest. Omnes igitur et singulos Seminarii Alumnos in Domino admonemus, ut ejusdem Statuta velut totidem Dei eloquia considerent, et qua talia, quanto possunt amore ac pietate, non amplectantur solum et legant, sed mente animoque comprehendant, servant, omnique sollicita executione præstent, seseque totos ad illorum præscripta accommodare studeant. Noverrint insuper hæc ipsa Statuta non mera consilia seu media esse, quibus Alumni ad pietatem sacerdotalem et scientias ecclesiasticas efformandi sint; verum magna ex parte totidem Regulas sive Præscripta esse, quibus cum Illmo Prædecessore nostro „perpetuam obligandi vim adjicimus”; adeo ut quisvis Seminarista hisce *de se in* conscientia, sub peccato np. veniali, obtemperare teneatur. Sit igitur omnibus alta mente repositum principium istud anreum: nunquam deliberata voluntate sine causa excusante ullum *Præscriptum* transgredi; atque etiam ea, quæ mere *consuluntur*, pro viribus adimplere ac persequi. — *De cætero fratres* (ut cum S. PAULO loquamur) *si qua virtus, si qua laus disciplinæ, hæc cogitate . . . hæc agite; et Deus pacis erit vobiscum.*



STATUTA SEMINARII
DIECESIS BUSCODUCENSIS
(2^a SECTIONIS).



CAPUT I.

De admissione et ingressu in Seminarium.

1. Pro admissione adolescentum, qui Seminario adscribi postulabunt, quotannis examen instituetur ante ferias majores in ædibus Seminarii 1^a Sectionis, die et dato in *Communicandis* anni currentis designandis.

2. In Seminarium intrantes corde et animo valedicent omnibus negotiis sæcularibus. Deinde totos se Dei et Ecclesiæ servitio devoteutes, paratos se exhibebunt ad omnia et singula exequenda quæ pro continuo in virtutibus et scientiis progressu injuncta fuerint.

3. Statim atque Seminarium ingressi fuerint, hæc Statuta sibi comparabunt, omnemque adhibebunt diligentiam, ut ea accurate cognoscant atque ad amussim observent.

CAPUT II.

De fine quem Alumni Seminarii sibi proponere debent.

4. *Adolescentes*, ait S. CAROLUS BORROMÆUS in Institutionibus Seminarii part. 3. cap. 1., *qui singulari Dei beneficio sunt delecti ut in Seminario instituantur, id potissimum intelligere debent, cujus gratia Concilii Tridentini decreto Seminaria instituta sint, et intelligentes sæpius animo repetere, omnesque nervos intendere ut illud, divina ope suffragante, ad animarum salutem, ad Ecclesiæ utilitatem, et ad pastorum solamen consequantur.*

5. Sunt namque ea de causa instituta Seminaria, ut in iis boni strenuique operarii efformentur, qui ad nutum Episcoporum diœcesibus inserviant. *In hoc vero collegio, inquit Concilium Tridentinum de Seminario loquens, recipiantur quorum indoles et voluntas spem afferat eos ecclesiasticis ministeriis perpetuo inservituros. . . hos Episcopus, cum ei opportunum videbitur, ecclesiarum ministerio addicet.*

6. Et revera in illum finem tota Seminarii institutio atque disciplina refertur; Alumni enim a vanitatibus et illecebris mundi remoti, a parentibus et propinquis separati, undique circumdati mediis intellectum illustrantibus et voluntatem moventibus, facile in virtutibus et scientiis proficiunt. Præterea mensa frugalis, somnus moderatus, orationis assiduitas, lectionum et collationum frequentia, Superiorum vigilantia, sociorum exempla, aptissima media

sunt quibus digni et idonei ministri Ecclesiæ efformentur.

7. Igitur Alumni intentioni Ecclesiæ sese conformantes, ea sint mente et voluntate, idque sibi quotidie proponant, ut evadant boni sacerdotes ad hujus diocesis utilitatem. Exemplum S. BERNARDI imitantes, sæpe hisce illis verbis se interrogent: *Ad quid venisti?* et continuo renoveant firmum propositum acquirendi omnes virtutes omnesque scientias quæ idoneo Ecclesiæ ministro vel necessariæ sunt vel utiles esse possunt. Grato etiam animo considerent specialem Dei erga ipsos bonitatem et munificentiam, qua eos ad sublimem sacerdotii statum vocat et occasionem præbet perveniendi ad exquisitam rerum sacrarum scientiam magnamque sanctitatem; adeoque nullam diem præterire sinant, qua non generoso animo sese totos Deo offerant devoveantque.

8. Quia vero sine speciali Dei gratia scopum istum attingere nequeunt, sæpe ingemunt cum Rege Propheeta: *Bonitatem et disciplinam et scientiam doce me* (Psalm. CXVIII). Sæpe etiam a Deo petant cœlestem illam sapientiam, qua Deo et hominibus grati reddantur, dicentes cum SALOMONE: *Da mihi sedium tuarum assistricem sapientiam et noli me reprobare a pueris tuis, quoniam servus tuus sum ego. . . . Mitte illam de sedibus sanctis tuis, et a sede magnitudinis tuæ, ut mecum sit et mecum laboret, ut sciam quid acceptum sit apud te* (Sap. IX).

9. Alumni sincero amore Seminarium diligant, tum ob illius utilitatem, quæ tanta est, ut merito a nonnullis

scriptoribus dictum sit, quod si præter Seminariorum instaurationem, nihil utilitatis a Concilio Tridentino in Ecclesiam promanasset, equidem Patrum labores et incommoda abunde compensata fuissent (*); tum etiam ob felicem in eo vivendi rationem, quæ mores primorum christianorum referre videtur: unus namque est omnium Alumnorum finis, unus ordo diei, una mensa, unus labor, unus spiritus, *cor unum et anima una* (Act. IV. 32). *Hanc igitur domum, ut monent Constitutiones Synodales S. FRANCISCI SALESII, considerent ut locum gratiæ et benedictionis, ad quem veniendum ipsis est cum gaudio, eaque sola intentione ut acquirant scientias et virtutes tremendo ministerio, ad quod præparantur, necessarias.*

CAPUT III.

De acquisitione virtutum.

10. *Cum duo præcipue, ait S. CAROLUS BORROMÆUS, in sacerdote et animarum pastore requirantur, probitas videlicet et doctrina, earum utraque in Seminario est comparanda. At sicut probitatis major est necessitas quam doctrinæ, sic in ejus studio magis est allaborandum; cum præsertim acquisitio virtutum in uniuscujusque assiduitate et industria, potius quam in Rectorum aut Præceptorum diligentia sit posita; ita ut nisi quis laborem adhibeat, non multum aut nihil aliorum illi vigilantia sit profutura.*

(*) PALLAV. Historia Conc. Trid. Lib. 21. Cap. 8.

11. Porro si omnes christiani acquirendis virtutibus incumbere debent, juxta illa CHRISTI Salvatoris verba: *Estote ergo vos perfecti, sicut et Pater vester cælestis perfectus est*, multo magis perfectioni intendere debent Seminarii Alumni, qui Deum in partem hæreditatis elegerunt et de numero eorum esse cupiunt, quibus CHRISTUS dixit: *Vos estis sal terræ.... vos estis lux mundi.*

12. Inde sequitur illos e Seminario dimittendos esse, qui licet studiis diligenter incumbant, in pietate tamen desidiosi sunt, et tepido vivendi modo alios a sedulo pietatis studio retrahunt, vel etiam a sequendis Superiorum consiliis avertunt.

13. S. VINCENTIUS A PAULO, qui sæculo decimo septimo restaurandis in Gallia Seminariis præcipuus auctor fuit, modum aptissime designavit quo Alumni debitam perfectionem acquirant. Vult enim, ut in primis sollicitè conentur omnes pravos habitus in sæculo forsàn contractos exuere, et cor ab omni inordinato affectu erga creaturas expurgare; deinde progrediantur in cognitione et amore Dei, cujus servitio se devovere volunt; veritatibus christianis et præceptis Evangelicis a CHRISTO revelatis totos se imbuere studeant; cordibus suis alte infigant principia sanctitatis et perfectionis, ac firmiter stantant imitari vitam et virtutes JESU CHRISTI (*).

Igitur Alumni debent 1.^o pravos habitus exuere et cor ab omni inordinato affectu erga creaturas expurgare;

(*) ABELLY, vie de S. VINCENT DE PAUL, Liv. 2. Ch. 12.

2^o. debent continuo anniti ut progrediantur in omni virtute, maxime in amore Dei, cui se totos devovere cupiunt; 3^o. debent CHRISTUM Salvatorem sibi tamquam exemplar proponere, doctrinis ejus sese imbuere, cunctasque illius virtutes imitari juxta monitum Apostoli: *Induimini Dominum nostrum JESUM CHRISTUM*; nam, ut ait S. HIERONYMUS, *qui conversationem illius imitari potest et universas in se exprimere virtutes, iste indutus est novum hominem et dicere cum Apostolo potest: Vivo ego, jam non ego, vivit vero in me CHRISTUS*. Eo autem magis necesse est, ut Alumni CHRISTI spiritum ac formam præ se ferre studeant, quod aliquando ejus legatione fungi ejusque ministri et cooperatores fieri desiderent.

14. Ad extirpanda vitia et inordinatos affectus exuendos, Alumni sequentur methodum traditam a Patrono suo sancto FRANCISCO SALESIO, parte prima *Introductionis ad vitam devotam*, a cap. 5. ad finem; præcipue vero conabuntur vitium suum dominans cognoscere et extirpare, cum sit origo omnium fere lapsuum, eoque superato cæteri defectus facilius corrigantur.

15. Ad perfectionem acquirendam in primis advertant humilitatem esse fundamentum omnium virtutum, superbiam vero radicem omnium vitiorum. Propterea omnem adhibeant curam, ut vel minimum superbiæ motum in se comprimant, et profundam adipiscantur cordis humilitatem, sine qua nequeunt esse veri discipuli CHRISTI dicentis: *Discite a me, quia mitis sum et humilis corde*.

Totus quoque habitus exterior humilitatem spiret, eique jungatur individua humilitatis comes, mansuetudo.

16. Frustra vero laborabunt ut acquirant humilitatem, nisi ad illam tendant per viam humiliationis. *Humilitatis virtutem si appetis*, inquit S. BERNARDUS, *viam non deserat humiliationis*. Ultra igitur amplectentur humiliationes a Superioribus imponendas; minora etiam officia aut quæ inclinationi repugnant, æquo animo adimplebunt; quinimo parati erunt abjecta quæque opera ex obedientia et charitate exercere. Nec umquam erit inter eos contentio quis eorum videatur esse major, nec disputatio de præferentia; sed unusquisque ultimum etiam locum libenter occupabit.

17. Aliam dein virtutem fundamentalem in corde nutrire et augere conabuntur, fidem scilicet *sine qua impossibile est placere Deo*. Illius igitur augmentum continuo postulabunt a Deo, cujus donum est, eamque crebris actibus fovebunt, recitando cum pleno mentis assensu non tantum ordinarias formulas actus fidei, sed etiam usitata symbola ipsamque professionem fidei a PRO IV et PRO IX editam.

Discant etiam magis magisque omnem spem et fiduciam in Deo collocare, ac se disponere ad ardua quæque suscipienda propter vitam æternam: ita enim fiet ut postea labores et incommoda in sacro ministerio occurrentia forti animo sustineant.

Considerent pariter charitatem esse omnium virtutum excellentissimam, juxta illud S. PAULI: *Major autem ho-*

rum est charitas; nec sine ea ullam perfectam virtutem posse subsistere, ut demonstrat S. THOMAS secunda secundæ quæst. 23. art. 7; illam vero vel maxime sacerdotibus esse necessariam, cum ex ea proficisci debeat sincerus zelus divini honoris et salutis animarum.

18. Diligens insuper studium collocent in acquirendis et augendis virtutibus cardinalibus; præcipue vero prudentiam sectentur, quæ a S. BERNARDO merito vocatur *moderatrix et auriga virtutum*, et quam pro directione animarum summe necessariam esse constat. Cæterarum quoque virtutum moralium regulas ac praxes a Theologis et Asceticis traditas cognoscere satagant, mediaque in eis proficiendi serio adhibeant.

19. Alumni Seminarii speciatim eminere conentur illis virtutibus, quæ statui suo magis sunt propriæ; et ita, juxta monitum S. CAROLI BORROMÆI, *mutuam charitatem ac benevolentiam omni studio amplectantur, ut quemadmodum debent, tamquam unius corporis membra, perfecto amoris vinculo colligentur*. Quare studeant evitare quidquid pacem et charitatem fraternam minuit aut perturbat. Nulla sit inter eos distinctio vel personarum acceptio, sed omnes sive divites sive pauperes, sive nobiles sive ignobiles pari vivendi modo cohabitent sub communis regulæ regimine, et tamquam ejusdem patris filii; nulla sit æmulatio nisi ut in bono quisque proficiat, secundum monitum S. PAULI Apostoli: *Æmulamini autem charismata meliora* (1 Cor. XII, 31), et illud S. CAROLI BORROMÆI: *Quas in aliis vir-*

Totus quoque habitus exterior humilitatem spiret, eique jungatur individua humilitatis comes, mansuetudo.

16. Frustra vero laborabunt ut acquirant humilitatem, nisi ad illam tendant per viam humiliationis. *Humilitatis virtutem si appetis*, inquit S. BERNARDUS, *viam non deserat humiliationis*. Ultra igitur amplectentur humiliationes a Superioribus imponendas; minora etiam officia aut quæ inclinationi repugnant, æquo animo adimplebunt; quinimo parati erunt abjecta quæque opera ex obedientia et charitate exercere. Nec umquam erit inter eos contentio quis eorum videatur esse major, nec disputatio de præferentia; sed unusquisque ultimum etiam locum libenter occupabit.

17. Aliam dein virtutem fundamentalem in corde nutrire et augere conabuntur, fidem scilicet *sine qua impossibile est placere Deo*. Illius igitur augmentum continuo postulabunt a Deo, cujus donum est, eamque crebris actibus fovebunt, recitando cum pleno mentis assensu non tantum ordinarias formulas actus fidei, sed etiam usitata symbola ipsamque professionem fidei a PRO IV et PRO IX editam.

Discant etiam magis magisque omnem spem et fiduciam in Deo collocare, ac se disponere ad ardua quæque suscipienda propter vitam æternam: ita enim fiet ut postea labores et incommoda in sacro ministerio occurrentia forti animo sustineant.

Considerent pariter charitatem esse omnium virtutum excellentissimam, juxta illud S. PAULI: *Major autem ho-*

rum est charitas; nec sine ea ullam perfectam virtutem posse subsistere, ut demonstrat S. THOMAS secunda secundæ quæst. 23. art. 7; illam vero vel maxime sacerdotibus esse necessariam, cum ex ea proficisci debeat sincerus zelus divini honoris et salutis animarum.

18. Diligens insuper studium collocent in acquirendis et augendis virtutibus cardinalibus; præcipue vero prudentiam sectentur, quæ a S. BERNARDO merito vocatur *moderatrix et auriga virtutum*, et quam pro directione animarum summe necessariam esse constat. Cæterarum quoque virtutum moralium regulas ac praxes a Theologis et Asceticis traditas cognoscere satagant, mediaque in eis proficiendi serio adhibeant.

19. Alumni Seminarii speciatim eminere conentur illis virtutibus, quæ statui suo magis sunt propriæ; et ita, juxta monitum S. CAROLI BORROMÆI, *mutuam charitatem ac benevolentiam omni studio amplectantur, ut quemadmodum debent, tanquam unius corporis membra, perfecto amoris vinculo colligentur*. Quare studeant evitare quidquid pacem et charitatem fraternam minuit aut perturbat. Nulla sit inter eos distinctio vel personarum acceptio, sed omnes sive divites sive pauperes, sive nobiles sive ignobiles pari vivendi modo cohabitent sub communis regulæ regimine, et tamquam ejusdem patris filii; nulla sit æmulatio nisi ut in bono quisque proficiat, secundum monitum S. PAULI Apostoli: *Æmulamini autem charismata meliora* (1 Cor. XII, 31), et illud S. CAROLI BORROMÆI: *Quas in aliis vir-*

tutes cernunt, eas in seipsis exprimere certatim contendant.

20. Secundum ejusdem Apostoli monitum se invicem honore præveniant. Juniores specialiter venerentur illos qui ætate majores sunt, maxime cum sacris ordinibus insigniti fuerint. Præsertim vero caveat unusquisque ne consodalibus sit *lapis offensionis aut petra scandali*, vel alliciendo ipsos ad transgrediendum Statuta Seminarii, vel murmurando contra mandata Superiorum, vel aliis quibuscumque actionibus minus rectis.

21. Caritas postulat ut fratrem a via veritatis errantem ad emendationem perducere conemur; itaque si quis videat sodalem delinquentem, observet quæ de correptione fraterna CHRISTUS præscripsit, et si opus sit, rem Superioribus deferat; quod præsertim est, si in sodali vitium deprehendatur, quo sacerdotio indignus effici posset. „Qui de vitio vel delicto alicujus a Superiore interrogatur, ad interrogata sincere respondeat, secus tamquam malorum fautor habebitur.” S. CAROLUS.

22. Quandoquidem *caritas nunquam excidit*, si condiscipulum obire contigerit, omnes ferventes ad Deum preces fundent pro refrigerio animæ ejus. Et quidem, si in ipso Seminario defunctus sit, ad normam postremæ Synodi Diœc. cap. 26, celebrabuntur in sacello Seminarii exequiæ solemnes; secùs vero prima die non impedita cantabitur Missa sollemnis *de requie*. Parentum quoque defunctorum animæ, pro quibus suffragia petuntur, precibus commendabuntur, orando in communi, post rosarium vespertinum,

Ps^{mo} *Miserere et De profundis* cum versibus et orationibus congruis. Pro sacerdotibus alibi defunctis, qui olim studia sua in Seminario absolverunt, post obitum, accepto illius nuntio, Missa in cantu celebrabitur.

23. Qui vere mitis et humilis est, facile duas alias virtutes acquirat, obedientiam et modestiam, quæ junioris clerici pulcherrima ornamenta sunt; nam, ut S. LEO affirmat, *nihil arduum est humilibus et nihil asperum mitibus.*

24. Obedientia exigit, ut omnes hæc Statuta, utpote ab eo præscripta, quem *Spiritus Sanctus posuit regere Ecclesiam Dei*, religiose observent. Itaque accurate adimplebunt quidquid ad comparandas virtutes et scientias præscribitur; diligenter assistent communibus exercitiis, neque unquam sine prævia licentia ab iis ob privata negotia, aut leviores corporis indispositiones se subtrahent. Et quoniam sine obedientia omnem ordinem perturbari necesse est, etiam in minimis obtemperabunt venerabilibus DD. Præsidi, Directori, Professoribus et Confessariis, eisque debitum præstabunt obsequium et reverentiam, ipsos suspicientes tamquam pastores et patres qui felicitati eorum toti devoti sunt. Cum filiali quoque fiducia cordis arcana intimosque affectus ipsis pandent, tanto magis quod difficillime quis in juventute sine alterius consilio cor actionesque suas moderari queat. De defectu vel delicto admoniti humiliter se reos fatebuntur et emendationem spondebunt, neque contra stimulum cal-

citrabunt aut molestos se ostendent. Si quod injungitur minus rectum aut opportunum videatur, cogitent Superiores sæpe agere ob rationes quæ subditos latent.

25. Modestiam clericis necessariam esse abunde indicat hoc universalis Ecclesiæ in Concilio Tridentino congregatæ effatum : *Sic decet omnino clericos vitam moresque suos componere, ut habitu, incessu, sermone aliisque omnibus rebus, nihil nisi grave, moderatum ac religione plenum præ se ferant.* Cogitent igitur Alumni sibi speciatim dicta esse hæc S. PAULI verba : *Induite vos sicut electi Dei, modestiam*; item hæc : *Modestia vestra nota sit omnibus hominibus*; atque adeo sedulo attendant ad regulas clericalis modestiæ et honestatis, quæ infra Cap. X. proponuntur, atque alibi in Conc. Prov. Tit. VIII Cap. IV, item in Syn. Diœc. Cap. XXVIII, latius describuntur.

26. Angelicam virtutem castitatis, præcipuum clerici ornamentum, Seminaristæ diligant tamquam thesaurum pretiosissimum, eamque omni conatu conservare et corroborare studeant; et vel ideo gnaviter incumbant exercitiis pietatis ac studio, cum otium sæpe sit occasio cogitationum iniquarum. Sensibus quoque, ac præsertim oculis, semper invigilent, ne mors per illos, tamquam per fenestras, ingrediatur.

CAPUT IV.

De exercitiis pietatis in Seminario peragendis.

27. Ut Alumni facilius in virtutibus proficiant, et perfectionem sacerdotio congruentem obtineant, varia ab ipsis pietatis exercitia peragenda sunt, quæ ad istum scopum attingendum efficaciter conducunt. Primum est frequens Sacramentorum Pœnitentiæ et Eucharistiæ susceptio: priore enim Sacramento non solum remittuntur peccata, sed gratia insuper peculiaris confertur, qua vita in melius emendetur; posteriore vero anima maxime confortatur, ut constantes in perfectione progressus faciat, et intime cum CHRISTO conjuncta, mire juvatur ut illius spiritus et virtutum particeps fiat. Saltem confitebuntur omnes singula quindena, diebus præterea festis Ecclesiæ solemnioribus: qui vero sacris ordinibus initiati sunt singulis Sabbatis, vel si in hebdomada occurrat festum notabile, pridie istius festi, atque annuente Confessario, sacram communionem devote suscipiunt. (*)

28. Alterum exercitium pietatis, quo Alumni in vita spirituali multum proficient, est meditatio; et hæc quidem quotidie per semihoram comprehensis precibus matutinis, instituenda est. Ut vero fructuose peragatur, primis post ingressum diebus methodus rite et fructuose

(*) Quid de tempore Confessionis instituendæ, cum respectu ad Indulgentias lucrandas, *Sacerdotibus* Diocesis nostræ speciatim indultum sit in Rescripto S. C. de Prop. Fide 22 Nov. 1846, videre est in Stat. Diœc. anni 1852 Art. VII. n. 3.

meditandi novis Alumnis explicabitur quadrante ante meridiem.

29. Non minoris utilitatis est lectio spiritualis; ea enim homo non tantum instruitur, sed etiam ad virtutem mag-nopere excitatur, ut constat ex vitis Sanctorum, qui lec-tione libri pii ad perfectiorem vitæ rationem suscipien-dam commoti fuerunt. Quare quotidie ante prandium, ad præscriptum N. 73, ejusmodi lectio habebitur ex libro quem D. Præses designaverit. Præterea quisque in par-ticulari frequenter huic exercitio vacabit.

30. Unanimis est sanctorum Patrum sententia crebrum conscientiæ examen esse medium efficacissimum ad extir-panda vitia virtutesque acquirendas. Quapropter quotidie ante prandium fiet examen particulare, et sub precibus vespertinis unusquisque diligenter conscientiam examinabit.

31. Alumni cultu præcipuo se devoveant sanctissimo Eucharistiæ Sacramento, quod realiter præsentem conti-net quem imitari tenentur, et a quo media eum imitandi obtinere possunt. Quare quotidie, uti dicitur N. 73, ante prandium fiet visitatio et adoratio sanctissimi Sacramenti. Quoties sacellum ingrediuntur, vel ab eo exeunt, omnes reverenter genu flectent. Tempore expositionis SS. Sa-cramenti peculiari modo incumbent venerationi tanto Mys-terio debitiæ. Omnes quoque adscripti sint Confraterni-tati Adorationis perpetuæ, et quotannis solemnem ado-rationis diem devote transigant.

32. Nihil est quod ad imitandum virtutes Domini nos-

tri J. C. magis excitet et juvet, quam frequens et attentata consideratio Passionis et Mortis ejus. Quapropter huic salutaris exercitio Alumni sedulo animum applicent, præsertim tempore Quadragesimæ, qua durante conciones et meditationes circa Passionem Domini præcipue versabuntur.

33. Omnes sinceram devotionem foveant erga beatissimam Virginem MARIAM, quam ut matrem tenerrimam speciali cultu venerabuntur. In hunc finem omnes quotidie visitationem facient et venerationem imaginis illius ac recitabunt quinque decades SS. Rosarii, qui cultus etiam extra Seminarium, tempore feriarum maxime commendatur. Insuper mensis Majus, qui beatissimæ Virginis cultui speciatim sacer est, speciali modo celebrabitur, servatis iis, quæ nuper ea de re in *Communicandis* anni 1880 §. VIII a Nobis præscripta sunt.

34. Omnes insuper sese constituent sub speciali protectione S. FRANCISCI SALESII, cui Seminarium ejusque sacellum est dedicatum, ut ejus dirigentibus monitis et prælucente exemplo, in virtutibus sacerdotalibus exercentur; S. CAROLI BORROMÆI, omnium Seminariorum Patroni et Patris, cujus salutaris monitis conabuntur obtemperare; S. VINCENTII A PAULO, cujus zelum charitate plenum imitari studebunt; S. THOMÆ AQUINATIS, cujus doctrinas sectabuntur; et S. JOANNIS Evangelistæ, Diocesis Buscoducensis Patroni, cujus castitatem virginalem sibi in exemplum proponent.

Festum S. FRANCISCI SALESII Patroni principalis Semi-

narii, quotannis solemniter modo celebrabunt; ejusdem cæterorumque vitas iterato legent, ut virtutes et præclara gesta eorum cognoscant et imitari studeant.

35. Ad augendum conservandumque devotionis spiritum, qui humana infirmitate facile dissipatur, plurimum juvat quovis mense diem recollectionis agere; et quotannis exercitiis spiritualibus vacare.

Memorata recollectio habebitur sequentibus diebus:

1. ultima die Octobris, sive *pridie* festi omnium Sanctorum;

2. *pridie* Dom. 1 Adventus Domini;

3. *pridie* Nativitatis Domini;

4. *pridie* festi S. FRANCISCI SALESII;

5. ante Dom. 2 Quadragesimæ;

6. feria IV Hebdomadis Majoris;

7. ante 1 Dominicam post ferias Paschales, qui in mense Majo incidit, quæ est pariter festiva in Seminario, designata in honorem SS. Cordis B. M. V. juxta statuta confraternitatis;

8. *pridie* Pentecostes;

9. ante Dom. 5 post Pentecosten;

10. *pridie* festi Assumptionis B. M. V. vel Sabbato ultimo ante ferias majores, si forte ante festum istud incidant.

Hisce diebus, juxta ordinem in App. N. 4^o descriptum, habebitur mane instructio de extirpatione vitiorum et acquisitione virtutum; gemina quoque lectio spiritualis in communi instituetur, et tempus antemeridia-

num alias studio scientiarum destinatum piis lectionibus et exercitiis unice impendetur ; præterea tempore illo servabitur silentium continuum , omnis quoque conversatio cum extraneis aut alia ejusmodi distractio sedulo evitabitur.

Immediate post ferias majores habebuntur exercitia spiritualia per tres dies , quæ deinde circa festum Pentecostes resumentur , dum per ordinandos juxta votum Sac. Congr. et mandatum Synodi Diœc. Cap. XVI ad decem dies protrahuntur. (*) Tandem a feria quarta Hebdomadæ Majoris usque ad finem Officii Sabbati Sancti erit devotionis tempus , quo meditationibus de Passione Salvatoris præsertim vacabitur , nec permittitur deambulatio extra Seminarium. Simili de causa et tempore Adorationis XL horarum hujusmodi deambulatio non fiat.

CAPUT V.

De Disciplina Seminarii.

36. Prima regula ipsumque fundamentum disciplinæ et recti ordinis est obedientia Statutis et Superioribus exhibenda , de qua N. 24 actum est.

37. Sicut necesse est ut inter Alumnos vigeat sincera charitas et mutua benevolentia , ut N. 19 dictum est , ita duplex vitium ipsis cavendum est , paci Seminarii æque ac Alumnis nocivum. Primum in eo consistit quod

(*) Vide Appendicem , N. 2 et 3.

unus alteri nimia amicitia jungatur; exinde enim plura mala sequuntur, ut advertit S. CAROLUS BORROMÆUS dicens: *A privatis amicitiiis nimiaque inter se familiaritate abstineant: conventicula ne agant, ex quibus multa damna in congregationibus existunt.* (Instit. Sem. part. 3. cap. 3.)

Quare omnes inter se sine discrimine versentur, ut monet idem Sanctus. Alterum vitium eorum est qui aversiones aut dissidia inter Alumnos excitant, quod non minus rigore prohibetur.

38. Absit ut in Seminario unquam reperiantur, quos Conc. Trid. Sess. 23 cap. 18 de ref. vocat malorum seminariorum seminarios. Quales sunt qui auctoritatem graviter pessumdant, qui turbulenti et irrequieti sunt, qui Seminarii famæ detrahunt, qui calumniantur socios aliasve personas Seminario addictas, qui factiosas subornant partes aut dissensionis ignem foveant, aut excitant.

39. *Cum silentium*, ut ait S. CAROLUS (Instit. Sem. part. 3. cap. 3.) *permultum ad pacis pietatisque conservationem, ad studia et ad multas perturbationes evitandas conferat*, Alumni istud præscriptis temporibus lubenter et accurate servabunt. Speciatim vero illud servent in Sacello et Sacristia ob reverentiam loco debitam; tempore studii, ne socii distrahantur; tempore prælectionum pro majori èt docentis èt discipulorum commodo; tempore prandii et cœnæ, quando ad præscriptum N. 74 et 77 pia lectio instituitur; omni denique tempore, quo silentium ex speciali motivo, puta sub exercitiis spiritualibus, etc. expresse

commendatur. Mane usque ad tempus jentaculi, similiter et vespere post rosarium, altum servetur silentium etiam in transitu de loco in locum. Severe etiam prohibetur tempore silentii et studii ingressus in alienum cubiculum.

40. Tempore recreationis ne sint lingua futili, sed de rebus utilibus inter se colloquantur; modesto semper sermone utantur, seduloque abstineant ab omni clamore incondito aliave hujusmodi indecora procacitate. Videant insuper, ne unquam, præsertim in accessu ad Sacellum, sigaros eorumve fragmenta intra Seminarii aditus projiciant aut etiam deponant. Idcirco et fumigatio tantum permittitur in cubiculis, locutoriis, aulis recreationis, sylva et area.

41. Usus vini aliorumque liquorum spirituosorum Alumnis omnino interdicitur. Sedulo etiam caveant a sigaris sumptuosis et aliis ejusmodi expensis supervacaneis; curent pari modo, ne ullius cibi aut potus sumptione tempus studendi teratur aut quovis modo impediatur. Longe præterea absit, ut quis, sive privatim sive cum sociis, tempore etiam libero, immoderatæ victus rationi quoquo modo indulgeat; profecto *Vos non ita didicistis Christum.* (ad Eph. IV. 20.) Si forte quis ob infirmam valetudinem extraordinaria refectione quandoque egeat, ea de Superiorum licentia sumatur loco ad hoc destinato aut speciatim designato.

42. Ingressus culinæ aliorumque locorum, quæ Alumnorum usui non sunt addicta, omnibus plane interdicitur.

43. In cubicalis omnia sint munda et ordine disposita. Nemo quidquam e fenestris projiciat. Extraneos, præsertim laicos, quibuscum in locis ad hoc destinatis loqui licet, nemo in cubiculum admittat sine licentia.

44. Sartores, sutores, barbitonsores et alios ejusmodi Seminarii opifices seu operarios admittere non licet, nisi tempore et loco ad hoc designato. Absit pariter, ut quis unquam in conversatione cum hujusmodi personis aliquid dicat aut faciat, quod decoro seu honestati clericali haud congruit.

45. Nemini licet extra tempora statuta e Seminario exire sine licentia. Nullus præsumat, etiam tempore deambulationis, aliquam domum ingredi sine venia expressa. Nullus quoque Alumnus e Seminario exeat, nisi ad præscriptum Syn. Diœc. Cap. XXIX pileo triangulari rite indutus sit. Tempore deambulationis extra Seminarium, pro majori decentia, abstinendum etiam est ab omni fumigatione. Licentia extra Seminarium prandendi aut pernoctandi non nisi ob rationabilem causam concedetur.

CAPUT VI.

De Acquisitione Scientiarum.

46. Præter perfectam vitæ rationem, alterum quoque finem sibi proponere debent Alumni Seminarii, acquisitionem nempe scientiarum, sine quibus utiles Ecclesiæ

ministri esse non possunt. *Seminarium enim non ea de causa est institutum, ut in eo simpliciter sacerdotes educerent, sibi tantum utiles futuri, ut ait S. CAROLUS BORMÆUS; sed profecto ut virtute et scientia exornati graviter in vinea Domini laborare valeant, et aliquando duplicem illam palmam obtineant, de qua Salvator dixit: Qui fecerit et docuerit, hic magnus vocabitur in regno cælorum.*

47. Ita vero scientiis incumbendum est ut pietas minime negligatur; pietas enim est optima scientiarum magistra et nutrix, et sine ea scientiæ facile nocent, nam, ut S. PAULUS ait, *Scientia inflat, charitas vero ædificat.*

48. Curent Alumni ut a studio scientiarum omnem removeant sinistram intentionem: *Sunt namque, ut ait S. BERNARDUS, qui scire volunt eo fine tantum ut sciant, et turpis curiositas est; et sunt qui scire volunt ut sciantur ipsi, et turpis vanitas est; et sunt qui scire volunt ut scientiam suam vendant, verbi gratia pro pecunia, pro honoribus, et turpis quæstus est. Sed sunt quoque qui scire volunt ut ædificent, et charitas est; et qui scire volunt ut ædificentur, et prudentia est.* Itaque ædificationem propriam et alienam, ipsamque adeo Dei gloriam pro fine studiorum sibi proponant. Ita fiet ut studia sint simul exercitia pietatis et religionis.

49. Meminerint ad solidum in scientiis progressum necesse esse, ut studiis oratio jungatur: *Justus, ut ait Sapiens, cor suum tradet ad vigilandum diluculo ad Dominum qui fecit illum, et in conspectu Altissimi depre-*

cabitur Si enim Dominus magnus voluerit, spiritu intelligentiæ replebit illum et ipse tamquam imbres mittet eloquia sapientiæ suæ (Eccli. XXXIX). Et alibi: *Optavi, et datus est mihi sensus: et invocavi, et venit in me spiritus sapientiæ* (Sap. VII). Legitur quidem, S. THOMAM AQUINATEM magis profecisse orando ad pedes crucifixi, quam libros volvendo; quinimo ipsum in difficultatibus locorum Scripturæ Sacræ ad orationem etiam adhibuisse jejunium. Merito etiam observat THOMAS A KEMPIS, quod *nobilior est illa doctrina quæ desursum ex divina influentia manat, quam quæ laboriose humano acquiritur ingenio* (De imit. CHRISTI lib. 3. cap. 31). Igitur Alumni sæpe, et maxime initio studiorum, lectionum et aliarum hujusmodi exercitationem, lumen S. Spiritus devote implorent.

50. Diaria politica ne legant, nisi illa pro quibus expressa a Nobis venia concessa fuerit. Sedulo etiam abstineant a quavis vana ac futili lectione romanensium aliorumque hujusmodi scriptorum, quæ gustum corrumpunt mentemque ad seria studia ineptam reddunt. Libros, qui judicio Superiorum pro scientiis sacris et lectionibus piis necessarii aut utiles sunt, dumtaxat apud se retineant. Moderatores Seminarii, speciatim ipsemet Director, huic rei serio invigilabunt et, ne secus fiat unquam, attente providebunt. Advertant insuper Alumni paucis, iisque præstantioribus libris immorandum esse; divagatio enim per plures parum docet et confusionem parit. Cæterum, quod rei istius respectu in Concilio Prov. Tit. IX cap II.

edicatur, hic pro inserto habeatur, et ab omnibus, quorum interest, sollicite servetur.

51. Alumni lubenti animo subeant quidquid pro eorum progressu in scientiis impositum fuerit, ut sunt examina, repetitiones, collationes, colloquia cum socio, et alia id genus plura.

CAPUT VII.

De scientiis quibus Alumni Seminarii incumbere debent.

52. Imprimis Alumni interdum repetant ea quæ in cursu Philosophiæ audierunt, præsertim principia Theodiæ et Philosophiæ Moralis; hæ enim scientiæ clericis pernecessariæ sunt ad refutandum incredulos, qui argumentis ex falsa philosophia desumptis Religionem præcipue impugnant. Pariter statis diebus et horis, puta vespere ab hora 8—8 $\frac{3}{4}$, in cognitione linguarum proficere contentur, neque excolere negligant studium linguæ vernaculæ qua pleræque functiones sacræ exercendæ sunt.

53. Omnibus cursus theologici partibus, tum speculativis tum practicis, pari cum diligentia incumbant; omnes enim necessariæ sunt ut quis in perfectum theologum evadat.

54. *Scripturæ Sacræ* studium præ cæteris omnibus diligant; adeo enim ejus notitia sacerdoti convenit, ut *Biblia Sacra liber sacerdotalis* a S. AMBROSIO nuncupentur. Firmum igitur atque statutum sit apud omnes nullum

prætermittere diem, quo in lectione Sacrae Scripturae aliquem passum non faciant. Hunc in finem studium matutinum in hujusmodi lectione regulariter impendatur. Porro quod ad partes legendas attinet, iis præsertim incumbere juvat quæ in lectione jam expositæ seu declaratæ sunt. Poterit etiam, si per tempus liceat, in antecessum utilissime legi ac relegi Novum Testamentum, ut illius textus, quoad fieri possit, memoriter cognoscatur. Recte monet MABILLONIUS in libro *De studiis monasticis*, ut prima Scripturae Sacrae lectio simpliciter fiat; dein vero brevis aliquis commentarius adhibeatur, qui litteram succincte ac dilucide explicet, quales sunt MENOCHIUS, TIRINUS, etc.

55. *Theologiæ dogmaticæ* notitia sacerdoti valde necessaria est ut fidei dogmata contra adversarios defendere, et fidelibus clare ac dilucide in concionibus et catechesibus proponere valeat. Diligenter itaque illius studio incumbant Alumni.

56. Cum ad curam animarum officiumque confessarii Alumni destinati sint, quod sine *Theologiæ moralis* notitia debite adimpleri nequit, sequitur huic scientiæ cum speciali zelo ipsis operam dandam esse.

57. *Juris canonici* studium pariter necessarium reputent; in eo enim agitur de vita et honestate clericorum, de auctoritate Summi Pontificis, Episcoporum, aliarumque ecclesiasticarum personarum, de regularibus, de ecclesiarum fabricis, sepulturis, juribus funeralibus, oblationibus, pœnis ecclesiasticis, etc. quæ omnia ignorare

clericum dedecet. Pari de causa et studium *Juris particularis nostri*, prout in Decretis et Statutis Provincialibus ac Diœcesanis continetur, omnibus summopere commendatur.

58. *Historiæ ecclesiasticæ* studium æque cordi habeant Alumni; quod enim CICERO de historia universim dixit, id vel maxime proprium est historiæ ecclesiasticæ, scilicet *esse eam testem temporum, lucem veritatis, vitam memoriæ, magistram vitæ, nunciam vetustatis*. De orat. lib. 11. cap. 9. Nec immerito S. CAROLUS BORROMÆUS eam collocaat *inter scientias quæ clericalis ordinis hominibus maxime accommodatæ sunt ad optimam religiosæ disciplinæ rationem*. Conc. provinc. Mediol. V. part. 3. Cap. 1.

59. *Eloquentia sacra* apud omnes maximi momenti esse debet; certum enim indubitatumque est ecclesiastici muneris caput præcipuum esse propagationem doctrinæ CHRISTI, eoque potissimum sacerdotis zelum referri debere. Ideo namque CHRISTUS discipulos præcipue elegit, teste S. MARCO, *ut mitteret eos prædicare*. Quin et Apostoli ista obligatione tam stricte se teneri existimabant, ut eam cæteris omnibus anteferrent. *Non est æquum*, inquit, *nos derelinquere verbum Dei, et ministrare mensis*. Et S. PAULUS ait: *Non misit me CHRISTUS baptizare, sed evangelizare*. Unde et prædicationem magnopere commendat discipulo suo TIMOTHEO: *Prædica verbum, insta opportune, importune*. Alumni igitur omnem operam adhibeant ut se apertissimos reddant ad catechizandum et prædicandum; quin-

imo ita se exerçant, ut diuturna consuetudine roborati, ait S. CAROLUS BORROMÆUS Instit. Sem. part. 1. cap. 3. *possint postea diebus festis sermones habere, etiamsi propter occupationes parochiæ non ita sedulam per eos dies studiis operam navare potuissent; quod facile et fructuose præstabunt, si catechismum diœcesanum memoria teneant, ejusque commentatores serio perscrutati fuerint.*

60. Qui *liturgiam sacram* ignorat, evidenter se exponit divinæ maledictioni, quam minatur Propheta JEREMIAS XLVIII. 10. *Maledictus, qui facit opus Domini fraudulenter.* Illius igitur studio gnaviter incumbant Alumni.

61. *Cantus ecclesiastici* scientia adeo clericis necessaria est, ut Concilium Tridentinum eam Seminarii Alumnos doceri nominatim præceperit. Quamobrem juxta votum Concilii Prov. Tit. V cap. VI principia cantus Gregoriani diligenter addiscant, notas rite canere variosque modos cognoscere studeant; sciant etiam accurate quomodo orationes, lectiones, cæteraque in liturgiis occurrentia intonare seu decantare oporteat.

CAPUT VIII.

De functionibus sacris aliisque exercitationibus.

62. Exercitium functionum ecclesiarum medium præbet efficacissimum quo Alumni in pietate et scientiis sacris proficiant; ecclesiastica enim munia, si debito modo et congrua devotione obeuntur, nata sunt cor hominis

ad Deum elevare, illudque filiali amore et summa erga divinam Majestatem reverentia replere. Accedit quod ea exercendo Alumni tempestive incipiant in vinea Domini laborare, et sese idoneos Ecclesiæ ministros exhibere. In his itaque muniis diligenter se exercent.

63. Primo loco recensenda est prædicatio verbi Dei, qua juniores clerici mire juvantur ut tam in pietate quam in scientiis proficiant, cum veritates quas prædicant altius menti et cordi infigere cogantur. Sic et addiscunt præcipuum status sui munus rite adimplere. Igitur crebræ fient ab Alumnis conciones, instructiones et catecheses sub directione Professoris cui hoc munus concreditum est.

64. Maximopere interest ut Alumni discant cæremonias sacras rite decenterque obire et rubricas accurate observare; tanto magis quod zelus et aptitudo in hac re magnum præbeant divinæ vocationis argumentum. In his igitur sedulo versentur sub directione Directoris itemque senioris Alumni a D. Præsidente eligendi, qui *cæremoniarum magister* seu custos vocabitur. Instante majori solemnitate, ipsemet Director eos prævie per turnum exercebit, singulorumque officia designabit.

65. In cantu Gregoriano, quo sacris mysteriis solemniter celebrandis et divinis laudibus convenienter decantandis nihil est accommodatius, cum zelo et constantia se exercent, præsertim qui aurem duriores habent, ut saltem sine fidelium offensione ordinaria cantare discant.

66. Juxta monitum S. CAROLI BORROMÆI in Instit. Sem. part. 1. cap. 2., ii *qui brevi animarum curæ sunt præficiendi, modum discant administrandi Sacramenta et exercendi alia munera quæ animarum curatori sunt obeunda.*

67. Præter examina ante susceptionem ordinum coram Nobis instituenda, quotannis triplex habebitur examen in scriptis, primum mense Januarii, secundum ante ferias minores, tertium ante ferias majores: examinum accurata ratio per notas Nobis reddetur, ut Alumnorum capacitas et progressus innotescant. Ea occasione ratio morum, ultimo trimestri, una simul Nobis exhibebitur.

CAPUT IX.

De Distributione Diei.

68. Mane surgitur quadrante ante horam quintam. Ad signum excitatoris omnes alacri corde dicent: *Deus, Deus meus ad te de luce vigilo, vel, paratum cor meum Deus, paratum cor meum, exurgam diluculo.* Inter induendum recitabunt Ps: *Miserere* et cor suum præparabunt ad orationem.

69. Preces matutinæ hora quinta in sacello inchoabuntur. Ad eas tempestive se conferent Alumni, animo pervolentes se vocari ut diei primordia Deo consecrent, ejusque benedictionem in omnes actiones diei implorent. Precibus et meditatione peractis, celebrabitur Missa, cui omnes, exceptis iis qui aliâ horâ Missæ inservire tenen-

tur, summa animi recollectione assistent, utpote quo nihil augustius habet Ecclesia Dei.

70. Post missam quisque ad cubiculum revertitur, illoque ordinato incipit studium a lectione Scripturæ Sacræ.

71. Quadrante ante octavam sumitur jentaculum, sub quo permittitur modesta conversatio; dein recreatio usque ad medium nonæ.

72. Medio nonæ studium aut lectio alternatim habebitur usque ad 11 $\frac{1}{2}$, dein recreatio usque ad quadrantem ante duodecimam.

73. Quadrante ante duodecimam omnes ad sacellum se conferunt ad adorandum SS. Sacramentum, deinde fit examen particulare, lectio spiritualis, et recitatur *Angelus Domini*.

74. Initio prandii clara et distincta voce fit lectio e Scriptura Sacra, ut dum corpus edendo reficitur, sua etiam animæ spiritualis refectio præbeatur. Illam omnes digne et attente auscultabunt. In fine prandii legitur ex vitis Sanctorum.

75. Post prandium recreatio usque ad horam secundam. Porro sub recreationibus, quæ diebus ordinariis conceduntur, abstinentia a studio maxime consulitur; cum enim in juvenili ætate applicatio prolixior insensibiliter enervet organa et intellectum infirmet, atque ipsam corporis sanitatem debilitet, requie interdum opus est. Tempus recreationis, quantum fieri potest, transigant in area aut sylva (caveant tamen ne limites assignatos transgredian-

tur perfringendo sepes, transiliendo fossas etc.), vel in aula recreationis ac ludis aut ambulatione occupentur, quæ dum animum exhilarant, corporis etiam exercitationi inserviunt. Curent etiam ut dum cubiculis exeunt, hæc apertâ fenestrâ aut portâ — pro variâ np. tempestatis conditione — aëri pateant.

Ad evitanda alia incommoda nusquam eas simul apertas relinquunt. Tempore studii porta semper clausa sit oportet.

76. Ab hora secunda alterne studium aut lectio usque ad horam quartam. Hora quarta potus et recreatio usque ad horam quintam. Hora quinta studium usque ad medium septimæ.

Diebus ordinariis lectiones dabuntur mane ab hora 9 — et rursum a $10\frac{3}{4}$. — Post meridiem vero ab hora $2\frac{1}{2}$.

In Ordine publice appenso assignabitur materia lectionum, ad quas omnes, ad signum campanæ, absque morâ, sine inutili retardatione aut colloctione, se conferent cum libris classicis nec non atramento, calamo et charta, notis describendis destinata. Post lectiones, quibus studium immediate subsequitur, omnes in cubicula se mox recipiant, audita recolligant, notas conscriptas revisant ac perficiant et studio incumbant; post cæteras vero lectiones ea ipsa fiant ante aliam lectionem de eadem materia habendam.

77. Medio septimæ exercitatio concionatoria vel catechetica, excepto die Sabbato, quo dicuntur Litanie Lauretanæ in cantu, in honorem SS. Cordis B. M. V. Se-

quantur preces vespertinæ, examen conscientiæ, et dicitur *Angelus Domini*. Deinde hora septima cœna, sub qua ab initio fit lectio ex Scriptura Sacra, et in fine legitur Martyrologium sequentis diei. Post cœnam recreatio usque ad octavam. Hora octava studium usque ad quadrantem ante nonam; exceptis diebus Dominicis et festivis, quibus protrahi potest recreatio. Diebus istis (dominicis et festivis) non admittuntur extranei ad visitandos Alumnos. Quodsi forte alio fine seu motivo quis accedat, brevis collocutio probata de causa a Superioribus concedi poterit.

78. Quadrante ante nonam Rosarium et præparatio meditationis sequentis diei. Hora nona omnes in silentio ad cubicula se conferant, et medio decimæ luminaria extincta sint. Studium post nonam prohibetur.

Dum lecto decumbunt, pie invocent SS. Nomina JESU et MARIE, et spiritum suum in manus Domini commendent, non secus ac si morituri essent.

79. Feria tertia et quinta singulæ hebdomadæ et feria secunda primæ hebdomadæ cujusque mensis post meridiem vacabitur a lectionibus, et Alumnis deambulatio permittitur extra Seminarii ambitum, non tamen sine speciali licentia extra limites parochiæ de Haaren et Helvoirt. Diebus istis ab hora tertia usque ad quintam permittitur, quin etiam, ad evitandam singularitatis notam, consulitur recreatio modesta in aulis ad hoc destinatis, et non alibi sine expressa venia. Post recreationem studium et cætera more solito.

Eadem obtinent in festo S. THOMÆ AQUINATIS, item Patroni Ill. Ordinarii Diocesis, RR. DD. Præsidis, Directoris et Professorum, quibus diebus insuper ante meridiem a lectionibus vacabitur et post Missam solemnem permittitur deambulatio ut supra, usque ad quadrantem ante duodecimam. Summopere tamen consultum est, ne hisce diebus, *groote campus* vulgo dictis, omne tempus liberum deambulationi insumatur, sed una alterave hora studio rerum utilium impendatur.

Præter has ordinarias vacationes R. D. Præses per se aut per alium extraordinarias post meridiem concedere potest, dum justa ratio adfuerit.

Diebus Dominicis et festis Missa solemnis hora nona celebrabitur, et finita Missa deambulatio, ut supra, conceditur usque ad quadrantem ante duodecimam. Medio tertiæ Vesperæ; post Vesperas recreatio ut supra; non tamen deambulatio fiat extra Seminarii ambitum.

80. Feriæ minores incipiunt Sabbato sancto, finita Missa, et protrahuntur usque ad feriam tertiam post Dominicam tertiam post Pascha; — majores mense Augusti, die a Nobis singulo anno determinanda, et finiuntur post quinque hebdomadas a die subsequente computandas. Optandum foret, ut quod Romæ et in aliis Italiæ diocesisibus in usu est, hic quoque observari posset, ut scilicet Alumni in ipso Seminario aut in villa suburbana feriarum tempus transigerent, ad instar SAMUELIS qui templi servitio semel addictus ad parentes non redibat,

et annua matris visitatione contentus jugiter Domino ministrabat; sed cum usus patriæ aliæque rationes id fieri vetent, equidem curent Alumni ut feriarum tempus sine pietatis et scientiæ jactura transigant, adeoque præcipua pietatis exercitia non omittant, et, quantum fieri potest, quotidie vacent studio aut lectioni, præsertim Scripturæ Sacræ. — Meminerint Alumni bono exemplo ædificare fideles summeque caveant, ne quid minus recti tempore feriarum in iis deprehendatur, quod Parochi vel inviti, ex præscripto Concilii Prov. Tit. IV cap. XI et Synodi Diœc. cap. II, Nobis aut Præsidi Seminarii referre deberent.

81. Finitis feriis ad Seminarium statuto tempore redeant; si quis legitimo impedimento diutius domi detineatur, de eo D. Præsidem certiozem reddere non differat.

CAPUT X.

De Regulis honestatis in Seminario observandis.

82. Cum Seminaria diœcesana instituta sint ad effor-
mandum perfectos sacerdotes, ab Alumnorum vivendi
ratione removendum est quidquid vitiosum, inurbanum,
ridiculum aut reprehensione dignum videri potest. Igitur
præter ea quæ ad pietatem et scientias acquirendas con-
ducunt, indicandæ sunt leges decori, quibus ita honeste
et decenter conversari discant, ut nemo quidquam in
ipsis jure reprehendere possit.

83. Has leges Alumni in Seminario præcipue obser-

vent, tum ut stabili amicitia et perfecta concordia inter se vivant, tum ut assuefiant honestæ vitæ rationi decentique conversationi, qua postea facilius animas CHRISTO lucrifaciant; recte enim monet S. AMBROSIVS, bonæ conversationis præcepta tempestive observanda esse, ut cum annis obfirmentur: *Ab adolescentia, inquit, spectanda sunt, ut cum ætate accrescant simul.* De Offic. lib. 1. Cap. 17.

84. Genuina pietas non solum non respuit urbanitatem, sed eam in sacerdote omnino requirit; cum enim homines de externis tantum judicare soleant, urbanitatis defectus in status sacerdotalis detrimentum vergit. Accedit quod inimici Religionis maxime nitantur sacerdotes contemptibiles reddere, nihilque aptius sit ad eorum conamina frustranda, conciliandamque Clero reverentiam et æstimationem quam modus agendi honestus et affabilis, ut videre licuit in S. FRANCISCO SALESIO aliisque Sanctis, qui suavi agendi ratione aliorum salutem efficacius procurarunt. Unde in pluribus Conciliis sollicitè commendatum fuit, ut sacerdotes exteriorem corporis habitum rite componant.

85. Clericum urbanum esse oportet ex motivo amoris Dei et proximi: et quidem si sincera erga Deum et proximum charitatè ferveat, quasi sponte honestus et affabilis efficietur.

86. Qui, cum solus est, negligenter se habere solet, habitus contrahit minus convenientes, a quibus in socie-

tate aliorum difficulter abstinere; Alumni igitur consuecant honeste et decenter agere etiam cum soli sunt.

87. Juxta monitum Concilii Tridentini Sess. XXII Cap. I de ref., clericorum actus et sermones *nihil nisi grave, moderatum et religione plenum* præ se ferre debent. Igitur Alumni 1^o. diligenter abstineant a nimio studio et affectatione in verbis et in actibus; 2^o. caveant ne salutationes cæterosque urbanitatis actus faciant cum ea elegantia aut levitate quibus homines mundani, præsertim juniores, utuntur; 3^o. ut intra justos limites sese contineant, sedulo attendant ad circumstantias locorum et personarum: quæ enim in uno loco decent, in altero dedecent; in loco publico, maxime si habeatur hominum concursus, major servanda est circumspectio quam domi; in propria domo quædam licent quæ in aliena offendunt; apud eos qui magnam profitentur urbanitatem majori cautela opus est; coram magnatibus ad minima attendendum.

88. Præter ista generalia præcepta Alumni constanter observare nitantur sequentes regulas speciales, juxta unanimum sapientum sententiam in sermone, in motibus corporis, in mensa et in vestibus servandas.

Regulæ honestatis in sermone servandæ.

89. *Prima.* Tonus vocis sit moderatus, nec altior nec demissior, nec exquisitior nec agrestis; *Ne quid indecorum sermo resonet tuus*, inquit S. AMBROSIVS lib. I. de Offic.

Cap. 18, *ipsum tonum vocis libret modestia; ne cuiusquam offendat aurem vox fortior; ut molliculum vocis sonum non probo, ita nec agrestem nec rusticum.*

90. *Secunda.* Cave ne loquaris de rebus quæ circumstantiis loci aut personarum non conveniunt, ut si de abstrusis theologiæ quæstionibus coram laicis dissereres.

91. *Tertia.* Ne proferas quod adstantibus verecundiam excitet aut erubescerentiam pariat.

92. *Quarta.* Numquam alterum ludibrio habeas; si vero joculari libeat, cum prudentia fiat et attendatur ad loci et temporis circumstantias ipsamque personarum conditionem et dispositionem; ne cum delectari intendis, fratrem offendas.

93. *Quinta.* Loquente alio nusquam loquaris, aut verba loquentium quovis modo interrumpere præsumas (S. BONAV. Specil. part. 1 Cap. 20).

94. *Sexta.* Clericus ne alterius personam agat, seu dicta vel facta ejus gesticulatione imitetur.

95. *Septima.* Sedulo cura ut tam in loquendo quam in scribendo unumquemque usitatis formulis honoris pro dignitate compelles.

96. *Octava.* Temetipsum laudare, propria facta, merita animive facultates extollere dedecet. Quinimo de teipso ne loquaris, nisi necessitas requirat, tuncque modeste et discrete fiat, nec plus quam necesse fuerit.

97. *Nona.* Risus sine strepitu fiat; quod speciatim monet Sapiens: *Fatuus in risu exultat vocem suam; vir*

autem sapiens vix tacite ridebit. (Eccli. XXI. 23).

98. *Decima.* Si quis te præsentem laudet, cave ab affectata humilitate simul et a nimia complacentia: sed laudes declina, aut si necessitas postulet, modeste assentire.

99. *Undecima.* Ne sis ad loquendum præceps, sed verba prius mente pondera quam lingua proferas. *Ante veniant ad limam quam ad linguam.* S. AUGUSTINUS.

100. *Duodecima.* Ingenti societatis condiciones offendit qui alteri in aures susurrat aut secreto loquitur.

Regulæ honestatis in motibus corporis servandæ.

101. Recte monet S. AMBROSIIUS de Off. cap. 18. N. 17: *Est etiam in ipso motu, gestu, incessu tenenda verecundia. Habitus enim mentis in corporis statu cernitur. Hinc homo cordis nostri absconditus, aut levior, aut jactantior, aut turbidior, aut contra gravior et constantior et purior et maturior æstimatur. Itaque vox quædam est animi, corporis motus.* Quod confirmant hæc verba Scripturæ Sacræ: *Sapientia hominis lucet in vultu* (Eccli. VIII. 1) *et ab occurso faciei cognoscitur sensatus* (Eccli. XIX. 26).

102. Alumni igitur generatim studeant ita omnes situs ac motus corporis dirigere, ut proximum ædificent; deinde attendant ad sequentes regulas:

103. *Prima.* Caput huc illuc leviter ne moveatur, sed cum gravitate quando necessitas postulat; neque nimis

rectum teneatur, sed in anteriorem partem leviter inflectatur, minime vero in alterutrum latus.

104. *Secunda.* Oculi demissi ut plurimum teneantur, nec immoderate eleventur, nec quovis divagare sinantur.

105. *Tertia.* Inter colloquendum, præsertim cum hominibus in dignitate constitutis, numquam defigantur oculi in eorum faciem, sed infra vultum. *Vide*, inquit S. BONAVENTURA, *sine defixione oculorum.*

106. *Quarta.* Facies non tristitiam aut alium affectum immoderatum præ se ferat, sed in ea constans eluceat serenitas, animi sereni indicium.

107. *Quinta.* Incessus ne sit levis aut nimis festinus, ut cursus speciem habeat; nec nimis tardus ut passus numerari videantur; sed moderatus et gravis. Ubi necessitas est currendi, decori ratio habeatur. *Est gressus probabilis*, inquit S. AMBROSIUS de Offic. cap. 18, *in quo sit species auctoritatis gravitatisque pondus, tranquillitatis vestigium; ita tamen ut studium desit atque affectatio; sed motus sit purus ac simplex; nihil enim fucatum placet.*

Regulæ honestatis in mensa servandæ.

108. *Prima.* Alumni Seminarii mensæ accumbentes accurate observent regulas honestatis moribus patriæ receptas, quæ ab honestæ conditionis hominibus servari solent et a probatis auctoribus traduntur.

109. *Secunda.* Submissis oculis et attente recitent preces ante et post mensam recitari solitas.

110. *Tertia.* Ut intra temperantiæ et sobrietatis limites semper se contineant, meminerint 1^o omnibus CHRISTI discipulis, præcipue vero clericis, gulam continuo refrænandam, sensusque mortificandos esse. 2^o Sanitatem non tam ciborum copia quam temperantia comparari. 3^o Sobrietatem naturaliter conferre ad scientiam, cum reddat caput liberum et serenum, aptumque ad meditando; unde SALOMON aiebat: *Cogitavi in corde meo abstrahere a vino carnem meam, ut animum meum transferrem ad sapientiam, devitaremque stultitiam.* Eccl. II. 3.

111. *Quarta.* In eundem finem sæpe recogitent hæc Scripturæ Sacræ monita:

Noli avidus esse in omni epulatione, et non te effundas super omnem escam. Eccl. XXXVII. 32.

In multis enim escis erit infirmitas, et aviditas appropinquabit usque ad choleram. Ibid. 33.

Propter crapulam multi obierunt: qui autem abstinens est, adjiciet vitam. Ibid. 34.

Sanitas est animæ et corpori sobrius potus. Eccl. XXXI. 37.

Advertant etiam sobrietatem a SS. Patribus summo opere commendari, et quidem a S. AUGUSTINO vocari *virtutis singulare auxilium, studiorum et artium bonarum discipulam pariter et magistram, membrorum omnium corporisque tutelam.* De Sobriet. cap. 1.

112. *Quinta*. Sedulo evitent omnes gulæ species hoc noto versu expressas:

Præpropere, laute, nimis, ardentè, studiose: quæ non temperantiæ tantum, sed et honestati atque modestiæ adversantur.

Regulæ honestatis in vestibis servandæ.

113. Vestimentorum decentiam curandam esse demonstrant hæc verba Scripturæ Sacræ: *Amictus corporis, et risus dentium, et ingressus hominis enuntiant de illo*. Eccli. XIX. 27. Igitur Seminaristæ observent sequentes regulas:

114. *Prima*. Vestes, quæ conformes esse debent habitui ecclesiastico in Diœcesi præscripto, semper mundæ sint et bene compositæ, ut ingenuum hominem decet; attamen *omnis absit vanitas et nimium earum studium*, quod monet Synodus Provincialis Mechlinskiensis anni 1570 tit. 14. cap. 2.

Diebus dominicis et festivis, usque ad Vesperas inclusive, omnes togam talarem gerant cum cingulo. — Tempore hiemis super toga indui poterunt veste densiore nigri coloris. — Toga talari cum cingulo induantur quoque, dum aliis diebus ad S. Synaxin accedunt, vel etiam adoratio SS. Sacramenti, concio, catechesis, et alia hujusmodi plura, ab ipsis vice sua publice peragenda sunt. A fortiori Sacerdotes, Missæ sacrificium offerentes, sic induti sint oportet.

115. *Secunda.* Dedecet crines crispare, componere et ornate discriminare, eosve nimis neglectos habere; itaque Alumni *capillis simplicem cultum adhibeant*, quod vult Concilium Mediolanense I.

116. *Tertia.* Odoribus aliisve exquisitis rebus ne utantur; clericus enim ejusmodi rugis addictus ridiculum se facit.

117. Porro sedulo notandum est minime sufficere ut has cæterasque tradi solitas honestatis regulas memoriæ infigant Alumni, sed etiam ad Deum recurrendum esse ut, ejus gratia adjuvante, linguæ, oculorum et totius corporis motus debite componere possint, atque in eis eluceat modesta urbanitas qua Deus honoretur et proximus ædificetur.

CAPUT XI.

De Examine vocationis et Ordinum susceptione.

118. Serio recogitent Alumni Dei vocationem prorsus necessariam esse ut statum ecclesiasticum amplecti liceat, nihilque infelicius homini contingere posse, quam citra Dei voluntatem sacerdotio initiari; unde S. AUGUSTINUS ait: *Quicumque se in Episcopatus aut Presbyteratus, aut Diaconatus officium impudenter conantur ingerere, quomodo combusti sunt CORE, DATHAN et ABIRON in corpore, ita isti comburentur in corde.* Et S. EPHREM: *Qui temere se conantur ingerere ad munus sacerdotii, licet non adsciti a*

gratia CHRISTI, ignem et mortem sibi accumulunt. Quinimo merito dicit Catechismus Concilii Tridentini: quo quidem hominum genere nihil infelicius ac miserius, nihil Ecclesiæ Dei calamitosius esse potest. Eo quoque sensu BENED. XIV in Encycl. Ubi primum § 1 verissime scribit: „Melius profecto est pauciores habere Ministros, sed probos, sed idoneos atque utiles, quam plures, qui in ædificationem Corporis CHRISTI, quod est Ecclesia, nequicquam sint valituri.”

119. Qui, facto debito examine, existimant se ad statum ecclesiasticum vere a Deo vocatos esse, curent 1^o ut omnem sinistram intentionem ab animo removeant. Absit enim ut illos imitentur quos carpit laudatus Catechismus, qui nempe *eo consilio ad hanc vivendi rationem se convertunt, ut quæ ad victum vestitumque necessaria sunt, parent: ita ut præter quæstum nihil in sacerdotio, quemadmodum vulgo cæteri omnes in quovis sordidi artificii genere, spectare videantur. Quamvis enim ex Apostoli sententia, natura et divina lex jubeat, ut qui altari servit, ex altari vivat; tamen quæstus et lucri causa ad altare accedere, maximum sacrilegium est. Absit quoque ut honorum cupiditate aut ambitione ad sacerdotalem ordinem ducantur; maximeque caveant ne vitam commodam aut divitias sibi proponant. Hi vero sunt, ut idem Catechismus ait, quos Solvator noster mercenarios appellat et quos Ezechiel dicebat, semetipsos et non oves pascere, quorum turpitudine et improbitas, non solum sacerdotali ordini magnas tenebras effudit,*

ita ut jam nihil fere a fideli populo haberi possit contemptius et abjectius; verum etiam efficit ut ipsi nihil amplius ex sacerdotio consequantur, quam JUDAS ex apostolatus munere, quod illi sempiternum exitium attulit.

Curent 2^o. ut recta puraque intentione tam sublimem statum amplectantur, scilicet ut in officio qualicumque sibi a Superioribus committendo Dei gloriam et salutem animarum procurant et seipsos salvent. *Non enim, ait Conc. Mediolanense IV. part. 3. de honestate clericorum, ad inertiam atque ignaviam, sed ad spiritualis et ecclesiasticæ militiæ labores clerici vocati sunt.*

120. Instante ordinatione quisque cum speciali diligentia se præparet ad Ordinem quem suscepturus est, qui quo major fuerit, eo majorem etiam præparationem et sanctitatem postulat. In hunc finem exercitia spiritualia Ordinum susceptioni præmittenda cum zelo et pietate obire satagat.

121. Post ordinationem quisque juxta mentem Ecclesiæ diligenter consideret Ordinem a se susceptum ac onus humeris suis impositum; ideoque sæpe recogitet monita sibi a Pontifice data, quorum hæc præcipua sunt:

Ad Tonsuratos: Filii dilectissimi, animadvertere debetis, quod hodie de foro Ecclesiæ facti estis et privilegia clericalia sortiti estis; caveate igitur ne propter culpas vestras illa perdati; et habitu honesto bonisque moribus atque operibus Deo placere studeatis.

Ad Ostiarios: ... Studete etiam, ut, sicut materialibus

clavibus ecclesiam visibilem aperitis et clauditis, sic et invisibilem Dei domum, corda scilicet fidelium, dictis et exemplis vestris claudatis diabolo et aperiatis Deo; ut divina verba quæ audierint, corde retineant et opere compleant, quod in vobis Dominus perficiat per misericordiam suam.

Ad Lectores: *Studete igitur verba Dei, videlicet lectiones sacras, distincte et aperte, ad intelligentiam et ædificationem fidelium absque omni mendacio falsitatis proferre; ne veritas divinarum lectionum incuria vestra ad instructionem audientium corrumpatur. Quod autem ore legitis, corde credatis atque opere compleatis; quatenus auditores vestros verbo pariter et exemplo vestro docere possitis.*

Ad Exorcistas: *Studete igitur, ut sicut a corporibus aliorum dæmones expellitis, ita a mentibus et corporibus vestris omnem immunditiam et nequitiam ejiciatis; ne illis succumbatis quos ab aliis vestro ministerio effugatis. Discite per officium vestrum vitis imperare; ne in moribus vestris aliquid sui juris inimicus valeat vindicare.*

Ad Acolythos: *Estote igitur solliciti, in omni justitia, bonitate et veritate, ut et vos, et alios, et Dei Ecclesiam illuminetis. Tunc etenim in Dei sacrificio digne vinum suggeretis et aquam, si vos ipsi Deo sacrificium, per castam vitam et bona opera, oblatis fueritis.*

122. Ad Subdiaconos: *Estote ergo tales qui Sacrificiis divinis et Ecclesie Dei, hoc est, corpori CHRISTI digne servire valeatis, in vera et catholica fide fundati; quoniam, ut ait Apostolus, omne quod non est ex fide, pec-*

catum est, schismaticum est, et extra unitatem Ecclesiæ est. Et ideo si usque nunc fuistis tardi ad ecclesiam, amodo debetis esse assidui. Si usque nunc somnolenti, amodo vigiles, etc.

Subdiaconi omnibus viribus connitantur ut horas canonicas distincte, attente et devote recitandi habitum acquirant, quo thesaurum meritorum sibi congerere possint. Si nihil obstat, Subdiaconos et Diaconos in Sacello coram Sanctissimo Sacramento hoc munus adimplere convenit, v. g. Primam cæterasque parvas horas recitent sub Missa quotidiana, Vesperas (salva tamen Rubrica pro tempore quadragesimali) et Completorium post prandium, Matutinum et Laudes sub recreatione pomeridiana. — Sub exercitationibus, de quibus N. 77, in Sacello recitatio Breviarii prohibetur.

123. Ad Diaconos: *Estote nitidi, mundi, puri, casti, sicut decet ministros CHRISTI et dispensatores mysteriorum Dei; ut digne addamini ad numerum ecclesiastici gradus, ut hæreditas et tribus amabilis Domini esse mereamini. Et quia comministri et cooperatores estis Corporis et Sanguinis Domini, estote ab omni illecebra carnis alieni, sicut ait Scriptura: Mundamini qui fertis vasa Domini. Cogitate beatum STEPHANUM merito præcipue castitatis ab Apostolis ad officium istud electum. Curate ut quibus Evangelium ore annuntiat, vivis operibus exponatis, ut de vobis dicatur: Beati pedes evangelizantium pacem, evangelizantium bona. Habete pedes vestros calceatos Sanctorum exemplis in præparatione Evangelii pacis.*

124. Ad Presbyteros : . . . *Itaque filii dilectissimi , quos ad nostrum adiutorium fratrum nostrorum arbitrium consecrandos elegit , servate in moribus vestris , castæ et sanctæ vitæ integritatem . Agnoscite quod agitis , imitamini quod tractatis , quatenus mortis Dominicæ mysterium celebrantes , mortificare membra vestra a vitiis et concupiscentiis omnibus procuretis . Sit doctrina vestra spiritualis medicina populo Dei ; sit odor vitæ vestræ delectamentum Ecclesiæ CHRISTI ; ut prædicatione atque exemplo ædificetis domum , id est , familiam Dei , quatenus nec nos de vestra provocatione , nec vos de tanti officii susceptione damnari a Domino , sed remunerari potius mereamur .*

Presbyteri sæpe etiam considerent quod ait auctor Imitationis CHRISTI lib. 4. cap. 5 : *Ecce sacerdos factus es , . . . Non alleviasti onus tuum ; sed arctiori jam alligatus es vinculo disciplinæ et ad majorem teneris perfectionem sanctitatis . Sacerdos omnibus virtutibus debet esse ornatus et aliis bonæ vitæ exemplum præbere . Ejus conversatio non cum popularibus et communibus hominum viis , sed cum Angelis in cælo aut cum perfectis viris in terra .*

CAPUT XII.

De egressu e Seminario et vitæ ratione deinceps servanda.

125. Memor obedientiæ in ordinatione promissæ , neosacerdos parato sit animo ad obediendum , qualescumque fuerint functiones ad quas destinabitur ; certum atque

persuasum habens sese eo fructuosius in vinea Domini laboraturum, quo magis erga Superiores docilis et obsequiosus fuerit, quandoquidem Scriptura Sacra dicit: *Vir obediens loquetur victoriam* (Prov. XXI. 28).

126. Absit ut otii vel commodioris vitæ desiderio functiones difficiliore obire detrectet, aut ad rudiorum vel pauperiorum parochiam mitti refugiat, dissimilis CHRISTO qui ad evangelizandum pauperibus se missum esse gloriabatur. Absit etiam ut ex inordinato erga parentes affectu invitatus adeat parochiam ab illis longe distantem; hanc enim Salvatoris exprobrationem mereretur: *Qui amat patrem aut matrem plus quam me, non est me dignus*. Quotopere nimius erga propinquos affectus in Ecclesiæ ministris displiceret S. CAROLO BORROMEO, patet ex hisce ipsius verbis: *Mihi intolerandum videtur quod adsint nonnulli quibus cum ecclesia proponitur cui deserviant, statim respondent eam sibi commodam non esse, ab agnatis et propinquis nimium distare. Absit utinam ab universo Clericorum cœtu spiritus iste!*

127. Multum desideret et in oratione enixe a Deo petat ad pastorem mitti, qui prudentia præditus et zelo animarum flagrans, parochiam suam bene regit, ut sub ejus directione regimen animarum, quod *ars artium* merito nuncupatur, addiscere valeat.

128. E Seminario discedens D. Præsidi, cæterisque Superioribus salutem dicat et grates honeste persolvat. In pos-

terum grati erga Seminarium animi signa semper exhibeat.

129. Ad munus sacellani aliudve officium promotus, jugiter conetur cum accurata functionum adimplerione studium sacrarum scientiarum conjungere, ut in illis continue proficiat. Caveat præsertim ne aliorum salutem procurans, sacerdotalem perfectionem negligat, suamque salutem in discrimen adducat. Unde sæpe mente revolvat hæc verba Apostoli: *Ne forte cum aliis prædicaverim, ipse reprobus efficiar*; ac sibi speciatim dicta existimet: *Attende tibi, et doctrinæ: insta in illis. Hoc enim faciens, et teipsum salvum facies, et eos qui te audiunt.*

130. Parochum aliumve Superiorem debito semper honore prosequatur, et sub ejus directione, prout monet Conc. Prov. Tit. II. cap. VIII. et Synodus Diœc. cap. IV, ad omnes officii sui partes rite adimplendas informari studeat. Porro ipsum consideret, uti revera est, tamquam principale caput parochiæ, seipsum vero ut coadjutorem illius, de cujus consensu omnia peragenda sunt. Sciat ipsi reservari causas quascumque majores, cujusmodi inter alias multas in parochia sunt: examen nuptientium, approbatio neocommunicantium, determinatio horarum quibus Missæ aliaque officia divina celebrari debent, etc.

131. Consideret se, quantumvis scientia et virtutibus instructum, experientia tamen carere, quæ solo usu et hominum prudentum consuetudine acquiritur: nihilque in juniore sacerdote præsumptione periculosius esse;

quapropter humiliter de se sentiat, seniores sacerdotes magni æstimet et directioni Pastoris ac Decani libenter se subiciat. Quæ sibi agenda sunt ab eis exquirat; si quid grave occurrat, consilium eorum cum fiducia petat et cum docilitate excipiat ac sequatur. *Ut æqualium usus dulcior*, inquit S. AMBROSIUS, *ita senum tutior est, qui magisterio quodam et ductu vitæ colorat mores adolescentium et velut murice probitatis inficit. Namque si hi qui sunt ignari locorum, cum solertibus viarum iter adoriri gestiunt, quanto magis adolescentes cum senibus debent novum sibi iter vitæ aggredi, quo minus errare possint et a vero tramite virtutis deflectere? Nihil enim pulchrius, quam eosdem et magistros vitæ et testes habere.* De Officiis lib. 1. c. 43.

132. Avaritiam fugiat; simul enim atque vitium istud sacerdotis animum invaserit, non tantum animi pacem sed et famam et auctoritatem ipsi adimit. *Avaritia*, ut ait BEN. XIV, in brevi 30 Junii 1741, *nulla potior contagio, quæ conceptam apud omnes sacerdotalis dignitatis perfectionisque opinionem magis inficiat evellatque.* Habens igitur alimenta et quibus tegatur, contentus vivat; de honorariorum modicitate ne umquam conqueratur. In vestibus et suppellectili christianam simplicitatem simul et decentiam status observet.

133. Sit homo interior et solitudinis amator. In cubiculo sacrarum scientiarum studio et exercitiis pietatis vacare in deliciis habeat. Rerum novarum ne sit avidus,

nisi quatenus ad religionem spectant. Gazulis politicis legendis ne nimium temporis impendat.

134. Ne se immisceat rei domesticæ Pastoris seu Superioris cui cohabitatur; neque cum famulantibus nimis familiariter agat; obsequia indebita ab eis ne exigat, debita vero honeste semper postulet. Si domesticos erga eum minus recte agere contingat, infirmitati et ignorantiae eorum compatiatur, errata ignoscat, nec facile querelas faciat quibus malum aggravaretur. Laicos, præsertim vero mulieres, in suo cubiculo ne recipiat, sed in loco ad hoc destinato, prout mandat Concil. Prov. Tit. II. cap. VIII. Cum Parochus consanguineos aut amicos ad mensam recipit, Vicarius sumpto cibo discedat, nisi Parochus aliter postulet.

135. Consuetudines ecclesiæ ad quam missus fuerit, observet, nec quidquam immutet nisi annuente Pastore. Abusus aliave mala, si quæ deprehendat, Pastori revelet, et non nisi cum consilio ejus ipsoque præeunte corrigere aggrediatur.

Ne sit rigorosus nec laxus; sed hæreat in sano tuto medio.


136. Si quos defectus in agendi modo Pastoris deprehendat, ne ideo debitum honorem ei deferre prætermittat. Si sub Pastore minus zeloso constitutus sit, eo diligentius officium suum adimpleat; caveat tamen ne ipsum carpere aut supplantare videatur, nec defectus illius revelet, præsertim laicis.

137. Erga parochianos omnes sit urbanus et affabilis, cum nemine tamen familiariter agat, nec domus frequenter adeat, præsertim eorum quos erga Pastorem minus bene affectos noverit.

138. Sedulo evitet conversationem sacerdotum, si, quod Deus avertat, ejusmodi forsan occurrant, quos sic redarguit S. CAROLUS BORROMÆUS: *Qui non bonum ipsi facere volunt, sed et ab eo cæteros distrahunt, dicentes: quid facitis? ad quid tot reformationes? ... væ hujusmodi sacerdotibus!*

139. Magnam erga Superiores seu spirituales seu temporales reverentiam semper corde retineat et ore profiteatur. Quinimo in concionibus et catechismis eam sæpe fidelibus inculcet his aliisve Scripturæ Sacræ verbis: *Spiritus sanctus posuit Episcopos regere Ecclesiam Dei. Omnis anima potestatibus sublimioribus subdita sit, sive Regi, quasi præcellenti, sive ducibus, tamquam ab eo missis, non solum propter iram, sed etiam propter conscientiam.*





Hæc, uti confidimus, juxta mentem Trid. Sess. XXIII cap. XVIII de Ref., Spiritu Sancto suggerente, ut plurimum olim statuta, hisce renovanda vel decernenda duximus; ut Clerus noster ad religionem, pietatem et scientias Ecclesiasticas sub æstimatissimis Moderatoribus magis ac magis informetur. Verum enim vero „vita Seminarii — ut cum S. CAROLO BORROMÆO loquamur — tyrocinium est vitæ clericalis, et ab eorum, qui in Seminario vivunt, recta institutione totius Diœcesis bonum pendet.”

Præter ea, quæ in Concilio Provinciali Tit. IX. cap. II. de sancta et religiosa regularum observatione decreta sunt, coronidis instar, quædam adjicere libet media, quibus sancta et religiosa illarum observatio mirifice adjuvabitur.

Primo venerabilibus Superioribus, nominatim vero charissimis nostris Alumnis commendamus jugem harum regularum meditationem et coram Domino ruminationem sive in meditatione, sive in lectione spirituali, sive, et præsertim, in examine particulari, etc.; persuasum enim sibi habeant a sedula et perfecta earum observantia multum pendere *positivam illam bonitatem*, quam in ordinando Theologi juxta SS. Canones requirunt, et quam Angelicus Doctor *excellentem bonitatem* dicit, *majoremque*

in ordinando exigit quam in iis qui Religionem ingrediuntur, quia — verba sunt S. THOMÆ — „ pondus Ordinum imponendum est parietibus jam per sanctitatem desiccatis, sed pondus Religionis desiccat parietes.”

Dein ut spiritum Regularum plenius assequantur Alumni, ac nutriant, ordinamus, ut singulo mense, die *Recollectionis*, puncta aliqua harum Regularum Alumnis prælegantur et explicantur, imo vero ea occasione proponatur quidquid ad accuratam earum observantiam promovendam expedire videbitur.

Præterea Moderatoribus omnibus quidem cura et vigilantia incumbit, speciatim tamen R. D. Directori, cujus proprium officium est, vigilantia demandatur, ut regulæ ab omnibus ad amnissim observentur.

Postremo, quod ab initio in Seminario nostro observatum fuit, ut scilicet habeatur liber, in quo, ut loquitur S. CAROLUS, *ratio status uniuscujusque Alumni* describatur, hoc est: in quo fideliter annotentur, uniuscujusque nomen et cognomen, ætas annorum et studii, ordines sacri suscepti, talenta et progressus vel defectus in studiis, et, quod maximum est, progressus vel defectus in observantia Regularum et pietate, etc. iterato quidem hisce præscribimus; sed insuper expresse volumus, ut libri istius extractum per R. admodum Dominum Præsidem, post singulum examen in scriptis (N. 67) nobis fideliter exhibendum curetur.

Hac ratione, in quantum possumus, „ SINGULORUM ado-

lescentium vitam, indolem et in studiis profectum explorando" (BEN. XIV. Encycl. *Ubi primum* § 2.), uti hucusque in Domino conati sumus, satisfacere intendimus tum vigilantiae in hac re pastorali, quam *continuam* postulant SS. Patres; tum cautioni gravi, quam in delectu ministrorum Ecclesiae SS. Canones ab Episcopis requirunt; tum etiam mandato divino, quod Apostolus ingeminat I. Tim. V. 21. 22.: *Testor coram Deo et CHRISTO JESU et electis angelis . . . manus cito nemini imposueris, neque communicaveris peccatis alienis.* Quem textum exponens S. CHRYSOSTOMUS ait: „Quid est illud *cito*? Non ex prima probatione, nec secunda, nec tertia, sed ubi diuturna consideratio praecessit exactissimaque discussio, tunc imposito manus.” —

Quod si igitur Nos, si meritissimi Moderatores vestri, tanta cum sollicitudine institutionem vestram clericalem, ex qua nedum vestra, sed tot animarum salus dependere noscitur, promovere et perficere pro munere satagimus: videte, charissimi, ut et vos tantis curis et laboribus digne respondere semper adnitamini. „Hortamur igitur vos omnes” — sunt verba Reverendissimi Praedecessoris, queis concludit Seminarii leges 30 Maji 1799 datas — „et obsecramus, ut Moderatoribus vestris et Superioribus, qui nostro nomine et auctoritate vobis praesunt, „et in scientia sanctorum vos instruunt, animum perpetuo gratum, in omnibus submissum et venerabundum „exhibeatis, memores semper moniti Apostolici (Hebr.

„XIII.): *Obedite præpositis vestris et subjacete eis. Ipsi enim pervigilant quasi rationem pro animabus vestris reddituri, ut cum gaudio hoc faciant et non gementes. Date igitur hoc gaudium cordibus eorum*”; date et Nobis, dilectissimi, hanc gratiam, ut quoadusque *cursum nostrum consummaverimus, audiamus filios nostros in veritate ambulare: atque deinde, etiam post obitum nostrum horum memoriam facientes, vos et qui vobis successuri sunt, patrocinantibus B. M. V. et SS. Patronis nostris, crescatis in gratia et in cognitione Domini Nostri et Salvatoris JESU CHRISTI. Ipsi gloria et nunc et in diem æternitatis. Amen.* (II PETR. III. 18).

Datum Buscoduci, die 3 Aprilis 1883.

Episcopus Buscoducensis,

† A. GODSCHALK.

APPENDIX.

N^o. 1.

CONFRATERNITATES

LEGITIME ERECTÆ, ITEMQUE ET ALIÆ INDULGENTIÆ CON-
CESSÆ ET RITE, EX PERMISSU ILLUSTR. AC REV. DOMINI,
PROMULGATÆ IN SEMINARIO BUSCODUCENSI,
2^æ. SECT. IN HAAREN.

1. Adorationis perpetuæ.
2. SS. Rosarii.
3. S. FRANCISCI XAVERII.
4. SS. Cordis JESU.
5. SS. et Immaculati Cordis B. V. M. pro conversione peccatorum.
6. SS. Trinitatis, — B. M. Virginis de monte Carmelo, — septem dolorum B. M. V., — et Immaculatæ Ejusdem Conceptionis.
7. Adversus blasphemias, maledicta et turpiloquia.
8. Denarii S. PETRI.
9. Altaris privilegiati.
10. Pii Exercitii Viæ Crucis.
11. Pii Exercitii 40 horarum die Dom. in Quinquagesima diebusque proxime sequentibus.
12. Indulgentia plenaria SS. Exercitia item diem recollectionis menstruæ obeuntibus, secundum tenorem sequentis rescripti Apostolici:

„BEATISSIME PATER,

HENRICUS DEN DUBBELDEN, Episc. Emaus. Vic. Apost. Buscoducensis in *Neerlandia* S. V. humiliter supplicat:...

4^o. Indulto Apostolico 30 Julii 1837, ad supplicationem nostram S. Sedes benigne concessit Indulgentiam plenariam *Sacerdotibus* nostri Vicariatus, qui trium saltem dierum spatio generalibus Exercitiis spiritualibus in Seminario, vel alio loco ab Ordinario designando vacaverint, si confessi et S. Communione refecti oraverint ad intentionem Suae Sanctitatis. Item *Sacerdotibus*, qui recollectioni menstruae intervenerint, sacro peracto et fuis ad Deum ad fines consuetos precibus, plenarias Indulgentias, etiam fidelibus defunctis per modum suffragii applicabiles. —

Cum vero hujusmodi exercitia per triduum, item recollectiones menstruae in Seminario nostro ab Alumnis Seminarii obiri quoque soleant, humiliter supplicat orator, ut et Alumni Seminarii (in utraque sectione); itemque si forte alii fideles ibidem similia pietatis exercitia peragerent, easdem indulgentias lucrari possint, modo S. Communione refecti in ipso triduo, et die recollectionis ad intentionem Sanctitatis Vestrae oraverint.”

„Ex audientia SS. D. die 19 Decembris 1847.

SS^{mus} D^{nus} Noster PIUS D. Prov. PP. IX, referente me infrascripto S. Congregationis de Propaganda Fide Pro-Secretario, mature perpensis expositis, benigne mandavit rescribi ut sequitur:

Ad 4^o. pro gratia in omnibus juxta preces.

Datum Romæ ex æd. dic. Sac. Cong. die et anno
quibus supra.

Gratis sine ulla omnino solutione quocumque titulo.

Sign. ALEXANDER BARNABO,

(L. S.)

Pro-Secret.”

N^o. 2.

ORDO EXERCITIORUM SPIRITUALIUM 10 DIERUM

ANTE SUSCEPTIONEM SS. ORDINUM.

~~~~~  
PRIDIE EXERCITIORUM.

Prævie a singulo Ordinando e *Catechismo de Tonsura*  
leguntur Monita communia pro exercitiis bene obeundis.

|         |   |                                                   |
|---------|---|---------------------------------------------------|
| ab hora | } | Recitantur Matutinum et Laudes sequentis diei.    |
| 4 1/2   |   | Litaniæ B. M. Virg. ad implorandam opem.          |
| ad      |   | 4 Puncta præparatoria.                            |
| 6 1/4   |   | THOM. A KEMP., de Imit. CHRISTI, Lib. I. Cap. XX. |
| 6 1/2   |   | Intersint precibus vespertinis.                   |

SINGULIS DIEBUS EXERCITIORUM.

|         |   |                                                                     |
|---------|---|---------------------------------------------------------------------|
| ab hora | } | Hymnus: <i>Veni Creator</i> . Preces communes ma-<br>tutinæ. Missa. |
| 5       |   | Recitatur privatim Rosarium 5 decadum.                              |
| ad      |   | Litaniæ SS. Nominis JESU.                                           |
| 6 1/2   |   | Septem Psalmi pœnitentiales cum Litanis.                            |
| 7       |   | Missa.                                                              |

ab hora  $8 \frac{1}{4}$  } Recitatur officium Primæ et Tertię.  
ad } Leguntur duo puncta priora 1. meditationis  
 $9 \frac{1}{4}$  } diei correspondentis.  
THOM. A KEMPIS, ut notatur.  
Rosarium 5 decadam.

ab hora 10 } Officium Sextæ et Nonæ.  
ad } Duo puncta posteriora 1. medit. diei correspond.  
 $11 \frac{1}{2}$  } THOMÆ A KEMPIS, ut notatur.  
 $11 \frac{3}{4}$  } Exercitatio liturgica.  
Examem, adoratio, etc.

POST MERIDIEM.

ab hora 2 } Recitatur officium Vesperarum et Completorium.  
ad } Duo puncta priora 2. meditationis diei.  
 $3 \frac{1}{2}$  } THOMÆ A KEMPIS, ut assignatur.  
Exercitatio liturgica.

ab hora  $4 \frac{1}{2}$  } Recitatur officium Matutini et Laudum sequen-  
ad } tis diei.  
 $6 \frac{1}{4}$  } Duo puncta posteriora 2. meditationis diei.  
THOMÆ A KEMPIS, ut assignatur.  
 $6 \frac{1}{2}$  } Rosarium 5 decadam.  
Intersint precibus vespertinis.

POSTRIDIE EXERCITIORUM.

|         |   |                                                        |
|---------|---|--------------------------------------------------------|
| ab hora | } | <i>Veni Creator</i> . Preces communes matutinæ. Missa. |
| 5       |   | 4 Puncta meditationis unicæ et ultimæ.                 |
| ad      |   | THOMÆ A KEMPIS, ut indicatur, Lib. I. Cap.             |
| 6 1/2   |   | XXV. et Lib. III. Cap. LIX.                            |
| 7       |   | Missa. — Communio. — Gratiarum actio.                  |

Hæc, quæ legenda præscripta sunt, alta, distincta et lenta voce, ab Exercitantibus, juxta ordinem a Magistro assignandam, præstantur; nisi Missæ sacrificio, administratione pœnitentiæ, aut alio ministerio impeditum sit sacellum; quibus casibus prædicta a singulis Exercitantibus, statis horis, privatim persolvuntur.

Actus virtutum theolog. etc. . . , ut in fine meditationum libelli assignantur, frequenter erunt sub Exercitiis spiritualibus præstandi, sive in communi, sive a singulis, pro opportunitate temporis, et indicatione Magistri.

Subinde poterunt et Litanie precesque diei per hebdomadam correspondentis, a Magistro recitandæ designari.

Horas hic præscriptas ad rigorem observabunt Exercitantes.

Silentium ac tempus recreationis transigent in tranquilla et suavi conversatione, potissimum cum sodalibus itidem exercitantibus.

Abstinebunt ab omni lectura curiosa et studio arduo, item a conversatione lusuque dissipatorio.

Cum extraneis vero non conversabuntur, neque pedem extra Seminarii limites ferent, sine expressa venia Moderatorum.

Observabunt jejunium, quantum ad numerum et quantitatem refectionum.

---

**N<sup>o</sup>. 3.**

EXERCITIA SPIRITUALIA TRIUM DIERUM  
IN INGRESSU SEMINARII POST FERIAS MAJORES.

~~~~~  
ORDO DIEI.

| | | |
|------|--------------------------------|---|
| Hora | 4 ³ / ₄ | Surgitur. |
| — | 5 | <i>Veni Creator</i> cum precibus matutinis. |
| — | 5 ¹ / ₄ | Sacrum. |
| — | 5 ³ / ₄ | Tempus liberum. |
| — | 6 | Meditatio. |
| — | 7 | Sacrum. |
| — | 7 ¹ / ₂ | Jentaculum; dein tempus liberum. |
| — | 8 ¹ / ₄ | Primæ et Tertię. |
| — | 8 ¹ / ₂ | Lectio spiritualis. |
| — | 9 | Tempus liberum. |
| — | 9 ¹ / ₂ | Meditatio. |
| — | 10 ¹ / ₂ | Tempus liberum. |
| — | 11 | Sextæ et Nonæ. |
| — | 11 ¹ / ₄ | Tempus liberum. |
| — | 11 ³ / ₄ | Examen status. |
| — | 12 | Prandium. |

POST MERIDIEM.

- Hora 2 Rosarium et Vesperæ.
— 2½ Tempus liberum.
— 3 Conferentia.
— 3¾ Potus.
— 4¼ Matutinum cum Laudibus.
— 5 Tempus liberum.
— 5½ Meditatio.
— 6½ Preces et Laudes.
— 7 Cœna ; dein recreatio.
— 8½ Examen, puncta meditationis et *Adoro*.
-

N^o. 4.

ORDO RECOLLECTIONIS MENSURÆ.

- Hora 5 *Veni Creator* cum precibus et meditatione consuetis.
— 5½ Sacrum.
— 6 Studium more solito.
— 7 Sacrum.
— 7½ Jentaculum, sub quo continuo aliquid prælegitur ex libro „*De imitatione Christi*”; dein tempus liberum.
— 8¼ Primæ et Tertiæ.
— 8½ Meditatio seu instructio.
— 9½ Tempus liberum.
— 10 Sextæ et Nonæ.

- Hora 10 $\frac{1}{4}$ Lectio spiritualis.
— 11 Tempus liberum.
— 11 $\frac{3}{4}$ Altera lectio spiritualis.
— 12 Prandium more solito.

ORDO RECOLLECTIONIS, QUÆ INCIDIT IN
DIEM DOMINICAM.

- Hora 7 Missa ut supra; dein Jentaculum.
— 8 $\frac{1}{4}$ Meditatio.
— 9 $\frac{1}{2}$ Missa in cantu sine ministris.
— 10 $\frac{3}{4}$ Lectio spiritualis.
— 11 $\frac{3}{4}$ Altera lectio spiritualis.
— 2 Vesperæ solemnes, quibus finitis audiuntur
confessiones.
— 5 Studium more solito.

N^o. 5.

Bibliotheca Seminarii, Professorum usui primarie destinata, Alumnis quoque inservire poterit de expressa licentia Professoris Bibliothecarii, cujus erit dijudicare, an et quatenus res ista in casu particulari expedire videatur.




INDEX.

—o—

| | PAG. |
|--|------|
| <i>Proœmium</i> | 5 |
| CAPUT. | |
| I. <i>De admissione et ingressu in Seminarium</i> | 14 |
| II. <i>De fine quem Alumni Seminarium sibi proponere debent</i> | 15 |
| III. <i>De acquisitione virtutum</i> | 17 |
| IV. <i>De exercitiis pietatis in Seminario peragendis</i> | 25 |
| V. <i>De disciplina Seminarium</i> | 29 |
| VI. <i>De acquisitione scientiarum</i> | 32 |
| VII. <i>De scientiis quibus Alumni Seminarium incumbere debent</i> | 33 |
| VIII. <i>De functionibus sacris aliisque exercitationibus</i> | 23 |
| IX. <i>De distributione diei</i> | 41 |
| X. <i>De regulis honestatis in Seminario observandis</i> | |
| <i>Regulæ honestatis in sermone servandæ</i> | 7 |
| <i>Regulæ honestatis in motibus corporis servandæ</i> | 49 |
| <i>Regulæ honestatis in mensa servandæ</i> | 50 |
| <i>Regulæ honestatis in vestibis servandæ</i> | 52 |
| XI. <i>De examine vocationis et ordinum susceptione</i> | 53 |
| XII. <i>De egressu e Seminario et vitæ ratione deinceps servanda</i> | 58 |
| <i>Epilogus</i> | 64 |

APPENDIX.

| | |
|--|----|
| Nº. | |
| 1. <i>Confraternitates legitime erectæ, itemque et aliæ indulgentiæ concessæ et rite, ex permissu Illust. ac Rev. Domini, promulgatæ in Seminario Buscoducensi, 2^e Sect., in Haaren</i> | 68 |
| 2. <i>Ordo Exercitiorum spiritualium X dierum ante susceptionem SS. Ordinum</i> | 70 |
| 3. <i>Ordo Exercitiorum spiritualium trium dierum in ingressu Seminarium post ferias majores</i> | 73 |
| 4. <i>Ordo recollectionis menstruæ</i> | 74 |
| 5. <i>Bibliotheca Seminarium</i> | 75 |



28,

tutions
redit re-
rts vol.
16 fr.

tum, et
rimonio.
50 c.

Ma-

in Semina. forum et
fort vol. in-12. 4 fr.

LA PHILOSOPHIE, à l'a-
vires et des Écoles. 2 vol.
12 fr.

ET CANONIQUE DES
STIQUES, ce qu'ils ont
uvent être de nos jours.

1 fr.

pour but de l'ouvrage
conçu de un jour.